

東
華
續
錄

東華續錄

同治五十五

臣王先謙敬編

臣張式恭恭校

同治五年丙寅春正月辛酉朔元旦停止筵宴○壬戌命郡王銜貝勒載治在內廷行走○賞醇郡王子載瀚頭品頂帶○以籌備福建兵糈予英桂左宗棠徐宗幹等議敘○癸亥諭軍機大臣等張亮基奏擊退竄擾獨山各匪並請調席寶田等援黔畱多文差委各摺片苗匪教匪粵匪分途闖入獨山勾結蔓延環境皆賊該處民勇鄉團踴躍擊賊以少勝眾迅將四面寇氛次第掃蕩剿辦尙屬出力所有在事之官紳團練著張亮基擇尤保奏候旨施恩毋許冒濫另片奏賊匪由獨山被擊後竄至荔波一帶滋擾著該署撫督飭文武員弁嚴密防剿毋稍疏虞粵匪竄陷嘉應州城席

寶田一軍尙須入粵會剿一時斷難赴黔朱洪章見駐南安防剿正當喫緊亦難遠調惟李元度前在平江辦理霆營叛勇業已竣事若將該員調往貴州尙屬可行著李瀚章卽派該革員酌帶勇丁赴黔助剿其應用餉需著劉崑李瀚章於該兩省協黔餉下支給或按月輪流撥給俾利師行不得稍分畛域多文前因田興恕案內革職永不敘用情節較重張亮基請畱該革員差委之處著不准行將此由五百里各諭令知之○甲子諭內閣前因給事中劉毓楠等先後奏參河南巡撫吳昌壽剿賊畱縱兵騷擾袒護屬員保劾失實及總兵張曜縱勇殺掠各款疊經諭令曾國藩秉公查奏茲據曾國藩奏稱遵將所參各節博加察訪並派員前往密查或漫無依據或確有見聞據實覆奏此案吳昌壽於捻匪竄河南之時赴許州稍緩尙非有意畱救陳州稍遲實因文報梗

阻惟馬兵騷擾該撫未能申明紀律嚴行禁止遂平縣知縣文王
偏捐妄押浮收錢糧且有京控未結之案該撫輒以民愛滋深保
列升階汝陽縣知縣蘊琛甚洽民心著有勞績該撫漫不加察遽
列彈章未免是非顛倒有負委任吳昌壽著交部議處遂平縣知
縣文王著卽行革職汝陽縣知縣蘊琛著開復原官總兵張曜並
無縱兵搶殺之事鄧州知州黃縉昌亦無貪劣可指之蹟均著毋
庸置議其揭參蘊琛之本管知府係屬何員有無扶私著吳昌壽
查明參奏不准徇隱回護尋吏部議上吳昌壽應降三級調用毋
庸查級紀議抵得旨著加恩改爲降一級調用不准抵銷○諭前
因給事中孫楫御史朱鎮先後奏參閻敬銘丁寶楨等貽誤各款
並朱鎮參奏山東鄒成縣知縣周士溥劣蹟當經諭令曾國藩查
奏茲據曾國藩將閻敬銘等被參各節查明覆奏此案閻敬銘並

無奉有僧格林沁函令赴曹助剿不肯往援情事其赴東昌防河木係先期奏明並非借此意存趨避當僧格林沁殉難曹州時該撫卽馳回省垣以致軍心不免惶惑至謂其將家眷裝扮民婦送往齊河縣署則並無此說山東應解僧格林沁協餉聞敬銘按月接濟並無所吝原參稱其於僧格林沁戰歿後佯爲不知奏請添設幫辦故示先見亦屬失實惟於齊河縣知縣李均係屬姻親該員有在省城開設店棧之事該撫毫無覺察轉將該員列入賢員屢登薦牘實屬非是聞敬銘著交部議處至山東布政使丁寶楨帶兵剿賊俱奉僧格林沁札委而行原參各節多係傳聞失據該藩司親自截賊於臨城驛殺傷過當所部亦並無淫擄重情功多過少官民尙無間言丁寶楨著免其置議前任山東兗沂曹濟道盧朝安前在單縣任內勒索富紳財物迨擢任道員後辦理大營

糧臺飲酒觀劇聞僧格林沁殉難之信蒼黃驚訝聲名惡劣心術
亦屬險鄙盧朝安業經告病開缺仍著勒令休致山東候補道王
繼庭才向可用並無劣蹟惟未親臨行陣聞敬銘將該員附入戰
功保奏致招物議王繼庭前已開復知府原官著撤銷道員以昭
公允候補知府署齊河縣知縣李均雖無招妓聚飲實據而開設
店棧與民爭利實屬貪鄙妄爲著卽行革職以示懲儆致山東鄒
城縣知縣周士溥並無任賊攻陷民其生祠不救之事著免其置
議尋吏部議上革職畱任山東巡撫聞敬銘薦舉不實請照例革
任得旨聞敬銘著加恩降爲三品頂帶仍畱山東巡撫之任○諭
軍機大臣等官文鄭敦謹奏擒匪闖入楚驛營勇索餉譁潰襄樊
黃孝同時喫緊並襄樊剿勝情形曾國清奏擒卒湖北又有叛勇
之變見派大軍援鄂各摺片前因喬松年奏採聞賊勢南趨楚軍

索餉譚潰各情當經諭令官文等查明因何潰變緣由據實具奏
本日據該督撫奏報雖與曾國藩所陳情形大致相同而於成大
吉何以受傷各情未能詳細聲敘著懷遵前旨據實具奏不准有
一字諱飾成大吉近來頗不得力官文等見令招集潰勇是否可
用並酌度情形妥爲辦理曾國藩已派劉銘傳一軍馳赴光固麻
城徑援黃州著卽飭令該提督迅卽赴援並令彭玉麟等水師駛
赴上游力固武漢門戶官文等於劉銘傳等軍到後責令成大吉
等就見有兵力會合痛剿成大吉如再不奮勉卽著嚴參治罪姜
玉順譚仁芳均已折回楚境誠恐該匪眾避兵而行復又回竄皖
豫地方著喬松年吳昌壽飭派出各軍嚴密防守遇賊卽擊毋稍
疏懈將此由六百里各諭令知之○諭本日據穆圖善奏甯郡回
匪悔罪投誠郡城業經收復見因辦理不善恐釀事端一摺另片

奏都興阿因病請假調理甯郡善後事宜仍當妥籌辦理等語並據都興阿奏收復甯夏郡城見將查辦大概情形馳奏一摺回目馬萬選等懇請投誠經都興阿會同穆圖善批准勒限獻城繳械據穆圖善奏稱該回眾於十二月初二日俱已遵批將城池圩卡全行撤空各堡回人俱移往納家牯一帶繳出槍礮刀矛多件並陸續呈繳銀米將倡亂之千總納萬有送營正法是該回等已屬真心悔罪何以都興阿將畱營辦繳銀米之回目保立等十一人誅殺並於十五日督帶陳天佑等入城各兵勇肆行搶殺殊不可解都興阿是否因該回等逾限至初七日始將圩卡撤退獻出郡城且城內尙有回民逗畱迹涉可疑是以督隊入城誅洗以杜後患抑係另有別情著卽將前後辦理實在情形明白回奏都興阿前已調補盛京將軍茲據奏稱病勢較前尤增懇請賞假調理等

語見在奉省馬賊猖獗都興阿當恪遵前旨速赴新任毋庸給予假期以重職守穆圖善見任甯夏將軍責無旁貸所有納家牘等處回眾如何妥籌善後之處著卽責成穆圖善妥爲辦理毋令已成之局又生他變其甯夏郡城防守事宜仍應認真籌辦以備不虞所請另簡大員來營查辦之處著毋庸議將此由六百里各諭令知之○諭甯夏一城久未攻拔茲因回目馬萬選等悔罪投誠經都興阿會同穆圖善批准該回目於十二月初三日將城圩獻出並呈繳器械軍火等件該回等暫移住城外之納家牘聽候安插自應乘機利導予以自新茲據穆圖善奏都興阿於十五日卯刻派員提撥該將軍所部隊伍並將遞稟之回目保立等悉行誅勦是日酉刻兵勇又復入城焚燒殺掠提督黃金山等彈壓不從甯夏城內火光燭天居民燒斃者無數並將口交銀米搶掠殆盡

等語而都興阿摺中並未將兵勇入城情形聲敘是否回情中變抑因各營兵勇彼此猜疑致相攻殺此次回眾投誠係都興阿穆圖善會同辦理其情節不應參差若是蘭州距甯夏尙近楊岳斌諒有所聞著該督迅將該處情形詳細馳奏以慰廬繫穆圖善摺片都興阿摺均著鈔給楊岳斌閱看將此由五百里諭令知之尋奏查由蘭州以至甯夏中間多爲回氛阻隔傳說無稽俟得確耗再行具奏惟納中牘事關緊要懇專飭穆圖善布置得旨納中牘安插事宜屢有寄諭責成穆圖善妥辦其都興阿穆圖善辦理甯郡回匪投誠勦撫兩歧仍著確實具奏○乙丑諭軍機大臣等德英等奏擊退攻撲長春廳大股賊匪並伊通被擾請飭蒙古黑龍江各派兵合剿摺片馬賊竄長春廳經德英等派令依克唐阿等帶兵進攻殲斃匪首劉果發姜老道等多名又經松鶴密帶練勇

擒獲匪首周榮等正法馬傻子等率眾攻撲長春廳亦經擊退而伊通地方又被該匪乘虛竄擾吉林賊眾兵單實不免顧此失彼之虞見在德英已派防省馬隊赴伊通助剿兵數甚微無濟於事且恐省城又復空虛再蹈伊通覆轍前諭文祥等將吉林在奉省馬隊撥回著卽全數調撥令回吉林交德英等妥爲調派以資厚集德英等仍先就見有兵力飭令嚴扼長春廳伊通等處痛加剿洗毋得再有疏失致干重咎所請調蒙古郭爾羅斯公就近派兵赴援長春廳著文祥等與伯彥訥謨祜會商妥調其黑龍江官兵能否由呼蘭吉林伯都訥一路前進會吉林官兵合剿之處著寶善斟酌情形妥爲辦理另片奏道路梗阻尋常事件仍請隨報奏陳等語吉林道路未通尋常應辦事件無關軍務者准由馬遞馳奏不得輒附五六百里急遞俟軍務告竣仍照常派差弁齎遞以

符定制將此由五百里各諭令知之○廣西巡撫張凱嵩奏收復
那檀見飭合圍山澤老巢迅圖蕪事得旨著卽督飭劉培一等乘
勝進攻迅拔孫逆老巢毋稍延緩並著知照瑞麟等嚴飭靈山等
縣合力兜剿聚殲醜類以靖邊圉又奏軍務未竣請將本年大計
展限舉行從之○予吉林陣亡委參領凌陞祭葬世職○免福建
本年例貢品物○丙寅諭內閣駱秉章奏假期已滿目疾仍未就
痊懇請開缺調理一摺駱秉章自簡任四川總督以來於吏治軍
務辦理甚爲妥協見在鄰境賊氛未靖籌餉籌兵均關緊要未便
遽如所請駱秉章著毋庸開缺再賞假四箇月安心調理四川總
督仍著崇實暫行兼署○總理各國事務衙門奏酌派前任山西
知縣斌椿率同官生等前赴外國遊歷採訪風俗得旨如所請行
○命德勒克多爾濟撥銀一萬兩濟巴里坤餉需○戊辰諭軍機

大臣等左宗棠奏官軍漸偏嘉應見籌合圍及龍溪勦匪情形各一摺汪逆盤踞嘉應左宗棠籌調各軍分路進剿其東北之高連陸劉清亮兩軍由樟樹坪進紮遇賊於雙板橋一帶血戰數時雖將賊擊退而哨弁傷亡不少東西南三路駐紮之粵軍亦復被賊掩襲或失去營壘是賊勢雖蹙而兇燄頗張該督見進大埔分布劉典王德榜黃少春高連陞康國器等軍互相聯絡嘉應州城東路東南東北及北路長圍之勢漸成正可力圖進取昨據劉坤一奏鮑超已於十二月初六七以次前進平遠之相公亭席寶田劉勝祥兩軍於初九十以次前進東石大柘兩路官軍計日業已到防自可遏其北竄平遠西竄興甯之路卽著左宗棠督飭各軍剋期齊進務期步步近逼合力兜圍毋畱縫隙以收聚殲之效並著瑞麟郭嵩燾檄令鄭紹忠方耀等軍與江閩之兵互相聯絡嚴密

布置儻粵省帶兵員弁不能得力致賊鋌走卽由左宗棠嚴參治罪鮑超及江西客軍入粵人地生疏瑞麟等務須設局寬爲採辦軍米以期無誤兵食劉坤一並著迅遵前旨出省督飭各軍會攻一面嚴扼本境邊防毋稍疏懈賊見長圍勢合擄船下竄潮郡必在意中左宗棠瑞麟等務當多派礮船飭令黃聯開朱明亮水陸各軍嚴備要隘毋令賊蹤善脫又成不了之局龍溪縣社匪郭凸郭好等踞寨從逆怙惡不悛經左宗棠調派羅大春等將該寨匪徒殄除淨盡自此漳州龍溪著名土匪一律肅清實屬大快人心另片奏粵東籌餉事宜已交戶部議奏矣將此由六百里各諭令知之○命浙江布政使蔣益澧馳赴廣東辦理軍務兼籌糧餉○予廣東陣亡知縣汪遇元等祭葬世職○免廣西死事知府孫蒙等虧短交代銀米○己巳以孟春時享 太廟 上前期親詣行

禮○諭軍機大臣等都興阿奏甯郡回逆投誠將前後辦理情形
縷晰詳陳一摺覽其所奏與穆圖善前奏相符都興阿因該回等
未能遵限獻城且城內逗畱回人不少所繳馬匹又皆疲乏不堪
並非戰馬該匪等首鼠兩端都興阿將保立等正法並帶隊進城
搜查驅逐恩威並用所辦甚屬認真見在城南各營布置已妥回
眾亦甚安靜都興阿自請從重治罪之處著加恩寬免惟奉省賊
勢狡獪亟盼該將軍會同文祥等督兵進剿著恪遵疊次寄諭星
速起程馳赴奉省以副委任穆圖善身為甯夏將軍且有督辦軍
務之責所有甯夏善後事宜及納家牘安插回眾諸務穆圖善務
當斟酌輕重緩急妥協辦理聯捷業經革職應卽遵旨隨同成祿
出關剿賊諒不敢再行干預辦撫爲逗畱計穆圖善切不可再信
其言致誤大局都興阿離營後穆圖善責無旁貸設或善後一切

事宜未能周妥致已成之局又生他變屆時縱思諉過他人以善自文飾朝廷惟知治穆圖善以辦理不善之罪杜嘎爾本係甯夏副都統所統馬隊數百人仍畱甯夏軍營最爲得力著都興阿斟酌情形妥籌調撥迅速奏聞都興阿前往盛京隨身親兵可以酌帶惟所募之勇須酌量裁汰歸併穆圖善軍營不可帶往盛京至收復甯夏時藉勢燒房搶擄之兵勇著穆圖善嚴密訪查將爲首滋事者正法以肅軍律不准含糊了事甯夏府城業已收復亟需文武員弁前往料理著楊岳斌嚴飭道員三壽知府孫家穀等速赴本任以重職守毋任遷延將此由六百里各諭令知之○庚午諭軍機大臣等喬松年奏楚境竄賊情形並派兵會剿一摺賊匪因成大吉營勇丁譁潰躡蹤南趨盤踞於麻城黃岡之間分擾羅田黃陂一帶勢甚蔓延喬松年見飭總兵王才秀四營馳赴麻羅

擇要駐紮視賊所向與鄂軍併力追剿尙能不分畛域著卽嚴檄該總兵認真剿辦毋稍鬆勁張得勝一軍見已改令駐紮麻埠並於雉河防軍內抽撥三營填紮三河尖防堵亦尙周密曾國藩見已派兵由豫援鄂著該大臣卽飭劉銘傳等軍奮力追剿賊旣分擾麻黃羅田各境則股數以分而較弱剿辦當易爲力務當就地殄盡不可再任北竄致成不了之局黃麻等處團練素稱得力官文鄭敦謹宜聯絡紳團協同助剿並嚴督鄂省將士實力進攻不得以本省軍務專待他人援應賊被劉銘傳援軍由北路追壓勢必南竄漢黃官文鄭敦謹尤當厚集水陸兵勇嚴密堵剿毋稍疏虞沿江一帶著曾國藩調撥水師防堵英霍舒桐等處喬松年當畱意防範成大吉所部潰勇見在辦理情形如何官文等自當力行籌剿擒獲首要各犯盡法懲治不得含胡粉飾使滋事兵弁得

遂所願轉致各軍紛紛效尤見在情形若何並著喬松年就近探
明具奏將此由六百里各諭令知之尋奏成大吉清勇經官文籌
給欠餉已收集七營新洲地方踞賊見調張得勝王才秀合力堵
剿得旨仍著飭令張得勝王才秀等隨時嚴密防範毋稍疏虞○
諭間敬銘協解奉天餉糈○命文祥等籌防 永陵附近地方○
壬申諭軍機大臣等崇實駱秉章奏請畱貴州提督在川帶兵防
剿一招前因貴州軍務喫緊簡授周達武爲提督令其卽赴新任
茲據該將軍等奏稱滇黔各匪時圖竄川周達武一軍三面馳防
有應接不暇之勢恐驟易生手必難調習等語周達武著准其暫
出四川俟邊防稍鬆接替得人卽令馳赴新任至趙德昌一員在
黔未能得力因勞崇光等密請調離本省是以有旨令赴四川交
崇實等差委著俟到川後由該將軍等妥爲鈐束毋任妄爲勞崇

光等密摺一件著鈔給閱看將此由四百里各諭令知之○雲南巡撫林鴻年奏見在所部前哨親兵於十二月二十一起程惟滇境山徑險僻村落成墟必須直抵昭城方堪駐紮得旨著卽懷遵疊次諭旨迅速赴滇相機進取毋得徒託空言一奏塞責自取咎戾懷之○癸酉諭內閣前據萬青藜卞寶第奏官荒地畝擬試墾水田當經諭令崇厚會同順天府直隸總督派員履勘茲據萬青藜等勘明海河北岸自邢家沽起至臥河村止開濬環渠中開洩水渠一道渠旁兩岸可開墾稻地五百餘頃計需渠工約銀八千數百兩此項銀兩准由崇厚借款興辦卽著督飭委員招戶認墾將酌定章程及應行事宜認真經理一俟辦有成效仍當將附近一帶荒地次第開墾以興地利而裕民生○乙亥諭軍機大臣等前據德英等奏伊通被擾當經諭令文祥福興將吉林在奉省

馬隊全數撥回並諭令文祥等與伯彥訥謨祜商調蒙古郭爾羅斯公旗就近赴援長春令寶善派兵與吉林會剿茲據德英馳奏賊匪潛越江東另股匪徒竄近省垣並探聞伯都訥被匪占踞請飭各路派兵速援各摺片賊眾由長春廳退屯農安附近靠山屯一帶盤踞卽由靠山屯青山口分路竄過江東在三家子屯遜扎保站一帶肆擾並欲向石頭城子雙城堡等處擄掠另由奉省圍場竄出馬步賊匪五百餘名已過輝發河直奔松杉蛟河等處踞吉林不過百餘里見在奉省大股匪徒業已全數竄過吉林該省地廣兵單處處皆賊難於兼顧勢甚危急亟宜由各路派兵馳赴援應以顧大局文祥福興務當遵奉前旨飛速飭令吉林在奉天馬隊官兵全數趕回吉林交德英調遣以顧根本並與伯彥訥謨祜迅卽妥商酌調郭爾羅斯公旗蒙古兵馳赴長春廳一帶就近

會剿其黑龍江官兵卽著寶善懍遵前旨迅速派兵馳援應由何
路進兵前赴吉林卽由寶善酌度機宜辦理德英仍當就見有兵
力妥爲防剿雙城堡等處亦宜激勵該處嚴密團防毋稍疏虞伯
都訥失守信息是否的確並著德英速卽查明實在情形具奏該
處距黑龍江所屬地方較近寶善務須速派將領帶兵前往防堵
毋令賊蹤竄擾益滋蔓延本日據軍機大臣呈遞文祥寄恭親王
等信函有派兵由昌圖廳一帶進至長春廳與吉林兵勇前後夾
擊所籌甚合機宜卽著迅籌辦理並與伯彥訥謨祜商催哲里木
盟蒙古馬隊趕緊會剿何路緊急卽由何路進攻劉榮合馬隊本
日已寄諭劉長佑催令卽赴奉省俟到奉時卽由文祥等酌量派
往吉林剿賊以期得力德英等摺片各一件均著鈔給文祥福興
閱看將此由六百里各諭令知之○諭吳昌壽奏賴牛等逆南竄

楚疆張逆折回豫境調兵截追一摺張總愚股匪竄入襄陽棗陽屬境經姜玉順宋慶等軍兜剿折向北趨分竄唐縣新野一帶復經官軍追擊攻拔呂營陳營等寨該逆悉向新野之白秋田九店一帶竄逸馬德昭一軍前因賴牛等逆竄入黃孝等處經吳昌壽派令越境追剿見因張逆回竄豫軍不敷調派復調該軍折赴舞陽葉縣一帶迎頭攔截著卽飭令馬德昭與宋慶等軍前後夾攻毋任狂竄成大吉所部潰散之後是否尙能成軍黃孝一帶賊氛甚熾官文鄭敦謹務當遵照疊次諭旨添派得力之兵認真堵剿毋令賊蹤深入劉銘傳一軍見已行抵正陽距黃州不遠著曾國藩卽飭該提督統率全軍入楚會剿務當窮賊所向痛加剿洗迅殄逆氛毋稍遲誤李昭慶所練馬隊刻下計可部署成行並著曾國藩酌度情形何路緊要卽令由何路進剿該大臣務當察看豫

楚賊情安籌兼顧以副委任將此由六百里各諭令知之○左宗棠瑞麟郭嵩燾奏濂逆汪海洋知官軍漸次進紮屢率剽悍騎賊至州東佛子高分水鄉曹塘一帶窺探地勢冀圖設伏衝撲臣左宗棠商請劉典會同高連陞黃少春王德榜前往塔子坳分水鄉等處察看形勢剋期進紮並令細探曹塘小路以防該逆設伏包鈔十二月十二日五鼓黃少春各軍齊進塔子坳分路扼紮汪逆先喊悍黨黃夜由曹塘小路出指湖頂雙坑以鈔橫徑一帶營盤之後自與胡瞎子等率悍賊數萬分四路繙擁而來勢極猖獗張福齊等分路迎勦自辰至未盪決數十合斃匪二三千名汪逆親率死黨力抗我軍再接再厲無不奮勇爭先適劉典親督官兵斜出迎擊見指湖頂伏賊鈔出深坑與李耀南等疾駛上嶺黃少春王德榜塔子坳營壘已成皆出隊夾擊槍礮環轟斃賊甚夥伏賊

遂敗去我軍乘勢追殺斬馘不可勝數汪逆大股尙在前抵死撐拒經張福齊等揮兵痛剿該逆亦殊死關正酣戰間簡桂林等下馬持矛衝陣賊眾勢如山頽我軍奮威衝殺賊屍枕藉追至佛子高始行收隊其雙板橋另有一支鈔後之賊經高連陞督親兵橫出分水鄉以斷賊後令魏光邴等由葵嶺翻山斜趨分水之右俟賊退攔截飭丁賢發等直向雙橋迎剿高連陞督親兵從分水鄉山徑出賊不意開槍轟擊賊見歸路已斷遂大驚亂適劉典黃少春王德榜各軍亦合兵衝殺賊眾奪命潰奔魏光邴等橫出擊之賊眾自相踐踏高連陞從後追殺斃賊數百名生擒二十九名雙板橋餘賊鼠竄回奔我軍沿途追殺轟斃不少據獲賊供首逆汪海洋被槍子從頭左偏穿出兩眉際立即墜馬昇回州城業已氣絕與各軍探報相符且各賊具稟赴營乞降者兩日之間已三四

千人計是戰共斬悍賊數千名轟傷者無算墜崖死者約數百名
生擒二百餘名見據賊中諜報賊黨因汪逆伏誅推僞偕王譚體
元爲首賊首如胡瞎子汪麻子黃矮子何明亮等皆踞紮城內人
數尙多必須速合長圍俾飛走絕迹然後誅其桀悍宥其脅從剿
撫兼施乃可嚴事 宗棠卽率親兵及楊和貴營由松口前進檄
高連陞由東北葵嶺進紮黃竹洋黃少春王德榜由正東分水鄉
進駐佛子高延紮而北與高連陞黃竹洋之營相接鮑超於十三
日抵平遠日聞可進紮相公亭已飭康國器俟鮑超營盤紮定卽
會期列隊徑由烏泥坪進扼正北洋門岌要隘與鮑超高連陞聯
絡咨商鮑超進紮西北平成鋪等處並催席寶田劉勝祥兩軍速
進西北大坪堡飭朱明亮進紮井塘使劉典全軍得由正東趨東
南之白宮市龍津橋進紮黃坑渡再進至芹菜洋自東南隅至西

北隅各軍密布則正南西南正西各路更宜防賊衝竄粵軍方耀等扼西面藍口一處前調粵軍鄭紹忠及曾敏行兩軍壘飭會同進紮西南之長少墟尙未卽進臣宗棠已飛檄督之飭其速紮以彌西南一隅罅隙更調新募八槳礮船駛抵南路水陸依護以成鎖圍上諭我軍踊躍用命殲除汪逆自應乘賊勢新挫之時一鼓作氣聚而殲旃左宗棠見率親兵由松口前進飭令高連陞等軍分布各路四面兜剿布置甚合機宜卽著督飭各軍合力進逼嚴密堵剿其方耀鄧安邦鄭紹忠等軍並著瑞麟郭嵩燾飭令迅速進紮儻敢稍涉遲延致罅隙未彌賊得竄突必將該員等從重治罪鮑超已抵平遠著左宗棠調令進屯西北平成鋪一帶會師剿賊並著劉坤一迅檄席寶田等軍由西北步步進兵務令四面合圍使此股殘寇飛走路窮盡行殄滅以彰天討而靖疆圉有厚

望焉將此由六百里各諭令知之○丙子工部尙書文祥奏遵查金州投誠之匪劫獄一案據拏獲逸犯供稱王小泉曾帶夥黨入城給獄犯送菜內藏器械該犯等劫獄出城後卽有賊匪接應等語是實係劫獄並非反獄王小泉於張登擊敗後逃至本溪湖僅賸二十餘人分匿山內見在購綫密拏務獲究辦報聞○予廣東陣亡副將陽命伸參將周壽臣等祭葬世職並殉難遊擊英秀祭葬世職建祠○以奉天督隊勦賊獲勝賞已革總兵官博崇武五品頂帶○戊寅諭軍機大臣等德英富爾琿奏賊眾合股竄擾省會情形危急請飭大兵援救一摺逆匪王洛七馬俊子徐姓等突竄伯都訥劫獄開庫將署副都統常奎署同知安榮縛載東竄旋入雙城堡境闖入堡城盤踞搜括德英富爾琿有統轄之責未能先事豫防實難辭咎著一併交部議處吉林地廣兵單賊勢猖獗

文祥福興已派定安等統帶馬步三千名前赴昌圖協剿卽著督飭定安等迅速東行視賊所向併力進剿不得稍有遲延致有貽誤德英富爾琿仍當就見有兵力嚴密堵剿保全省會重地其協領富明阿等所帶之兵仍著斟酌賊情趨重何處調往何處迎擊不得株守一隅顧此失彼文祥等前調之黑龍江馬隊一千名昨已有旨令其畱於吉林歸德英等調遣著卽知會寶善迅催此項馬隊星夜馳赴吉林以厚兵力毋稍延誤常奎安榮是否被害著德英等查明具奏本日據曾國藩奏烏爾圖那遜馬隊見同劉銘傳赴鄂若由楚赴遼程途太遠且僅調弁兵百餘名誠恐於事無濟已令駐紮陳州之色爾固善一軍並高福一起托倫佈一起共計九百餘人起程赴奉等語此項馬隊均係吉林黑龍江弁兵久從征役還救桑梓必能得力著文祥等催提前進酌量調赴吉林

助剿將此由五百里各諭令知之○諭曾國藩奏遵派馬隊回援奉天並請令劉秉璋襄辦軍務各摺片奉天所屬各股馬賊見已全數竄擾吉林該處兵力單薄勢已危急文祥福興所部兵勇本屬無多援剿不敷分布曾國藩以烏爾圖那遜所部兵數較少鄂省距奉天程途稍遠見改派色爾固善等管帶吉林黑龍江馬隊九百餘人卽日由陳州起程馳赴奉天實屬不分畛域力顧大局劉秉璋統帶淮軍素稱得力著李鴻章卽飭令該學士迅赴曾國藩軍營襄辦軍務該學士到營後應行駐紮何處卽由曾國藩酌度情形辦理將此由四百里各諭令知之○諭閻敬銘迅解奉天協餉○己卯諭軍機大臣等張之萬奏遵議籌運新漕請飭撥款並請催找撥不敷等銀各一摺本年江北新漕經戶部奏准一半照舊辦運所有挑河修牕各事宜自應早爲辦理以期無誤運行

茲據張之萬奏稱估計四廳所屬各汛塘長河淤淺工段必須挑
挖者共估挑工銀二萬五千五十餘兩此項銀兩尙有前經鄭敦
謹奏准未撥銀二萬五千六十餘兩足敷挑工之用卽著張之萬
催提前項銀兩趕緊興辦其餘各廳另案工程共需銀五萬兩著
閻敬銘卽飭藩運兩司如數迅速籌撥毋稍遲延至上南廳等處
歲修土工亦應趕早興辦前經張之萬奏准指撥壬戌年找撥不
敷彌補舊欠之項並續請添撥歷年節省防險銀六萬兩及應撥
丙寅年歲料例價歲麻加價四成銀兩著吳昌壽遵照前旨迅速
撥發俾辦工不至遲誤是爲至要將此各諭令知之○諭馬新貽
奏總兵出洋巡哨遇賊被害調兵殲擒巨寇一摺此股外洋盜匪
膽敢於水師巡哨之時駕駛廣艇圍裹師船抗拒官軍致令署總
兵剛安泰等同時戰歿實屬罪大惡極見經署副將張其光等統

率師船駛往剿捕立將首匪梁彩斬馘斃匪多名奪獲船隻器械並擒獲戕害官軍各犯剿辦尙屬迅速卽著馬新貽將省城事宜妥爲部署卽馳赴甯波海口督飭在事各員弁將餘匪搜捕淨盡務絕根株以清洋面將此諭令知之○庚辰諭軍機大臣等趙長齡劉昉奏犯陝回逆回竄平固涇防缺糧慶臺勒捐不解一摺據奏前竄隴州逆回經官軍奮擊疊勝該逆已由靈臺崇信一帶竄回平固惟涇州糧餉缺乏楊能格將紳民捐定糧石勒解慶陽不准運解涇州庇護雷正綰通同一氣專與譚玉龍龔齡等語楊能格自參劾周顯承後與涇州營將積不相能若仍令管理慶陽糧臺恐難得力本日業經明降諭旨楊能格毋庸辦理慶陽糧臺卽著林壽圖迅速馳赴慶陽接辦糧臺事務並准其專摺奏事將各營糧餉酌度緩急均勻撥解以利軍行其陝西藩司一缺著劉昉

派員署理以便林壽圖交卸前進並著楊岳
壽圖到慶陽接替後卽赴甘肅臬司本任仍一面聽候楊岳斌等
查辦毋許逗畱甯夏府城雖已收復穆圖善尙須督兵規取靈州
及金積堡等處自應厚積兵力藉資攻剿雷正綰應否調赴甯夏
軍營隨同穆圖善辦理軍務之處著楊岳斌劉蓉遵照前旨迅速
覆奏前據劉蓉奏雷正綰馬步不過千餘茲據趙長齡奏譚玉龍
將迅字五營撥交雷正綰所部仍不下二三千人若竟斷其接濟
是激之使變也林壽圖仍當斟酌情形量爲解濟俾免譁潰滋事
趙長齡另摺奏查訊大概情形飛咨楊岳斌前赴慶涇會查具奏
等語逆回逼近蘭州防剿正當喫緊楊岳斌一時恐難出省趙長
齡若必俟楊岳斌到涇會查轉恐耽延時日著恪遵疊次諭旨迅
赴涇州將周顯承被參各款及所供各節秉公查辦近來外省積

習往往偏執已見回護前說趙長齡務當破除情面認真查訊一秉大公毋得稍涉瞻徇致負委任正在寄諭間據雷正綰奏陳甘省見在情形並布置前敵靈州回眾乞撫各摺片所奏先取靈州以剪河狄之羽翼各情不爲無見靈州回眾能否將馬化澂父子捆獻投誠雷恆李起高曾否解到著將雷正綰摺片鈔寄楊岳斌閱看由該督酌度見在情形妥籌辦理楊岳斌奏聯捷因病出缺所部馬步各軍暫行分別管帶等語除聯捷係革職之員毋庸議卹外所有黑龍江馬隊卽著照楊岳斌所請檄調來省藉資訓練如查有疲乏不堪策遣者仍當隨時遣撤以節糜費其定字營勇見已就食涇州著暫歸譚玉龍兼管以資鈐束所需餉項仍著林壽圖酌量接濟將此由六百里諭知楊岳斌趙長齡劉蓉並傳諭林壽圖知之○命辦理慶陽糧臺甘肅按察使楊能格回任以署

陝西布政使林壽圖辦理甘肅慶陽糧臺事務○辛巳諭軍機大臣等前因左宗棠奏粵海關收稅請由督撫設法籌辦當諭令戶部議奏茲據奏稱該關積弊已深歷任總督監督縱不至盡屬肥已亦難保不受家人丁書之蒙蔽今左宗棠奏聞每歲不下二百萬兩與該關奏報銀數大相懸殊請飭兩廣總督廣東巡撫查明辦理等語粵省軍務日久未竣籌餉之難該督撫監督等亦所深悉豈容任聽家人丁書羣相吞食視爲故常亟應嚴行查辦著瑞麟郭嵩燾嚴密查明該關各口實在收稅數目以及蒙蔽情形妥議章程限三箇月內詳細奏明再由該部酌覈辦理該督撫受恩深重務當破除情面秉公確查儻敢飾詞回護有意彌縫別經發覺卽治該督撫以查辦不實之咎原摺著鈔給閱看將此諭令知之○諭官文鄭敦謹奏西路官軍擊賊出境襄樊一帶肅清見分

路籌剿及遣撤成大吉一軍潰勇請分別懲辦一摺張總愚股匪
攻撲樊城等處經江長貴會合譚仁芳姜玉順等及水師團練疊
擊大勝斬擒首李成年張大義等多名賊向西北竄去東路賴牛
等逆蔓延於麻羅黃孝諸境經官文等調藍斯明等進擊亦有斬
擒此股賊匪尙盤踞於黃陂一帶官文見令藍斯明等由孝感取
道楊店進攻黃陂一帶之賊兼遏逆蹤上竄德安之路令總兵梁
洪勝由瀟口一路而進兼顧漢鎮令唐協和趕募數營爲各路遊
擊策應之用令唐際盛馳赴東路督率諸軍專辦賴牛股匪官文
亦卽日出省駐紮漢口調度所籌均尙妥協著卽督飭諸軍認真
剿洗務須杜賊上竄之路免致再擾完善官文出省以後省防事
宜著鄭敦謹悉心經理毋稍玩忽成大吉所部首先滋事之潰勇
已正法十數名其餘脫逃者仍責令成大吉查拏懲辦至見在各

營招勇不得以

勇丁復行應募以肅戎行張逆竄向新野一

帶疊經諭令吳昌壽督飭馬德昭與宋慶等軍前後夾攻著卽督飭該總兵等實力攻剿毋再任其狂竄劉銘傳一軍曾國藩令其赴黃州協剿李昭慶馬隊應卽飭赴河南助剿張樹聲已簡放直隸按察使見在劉長佑赴三屯營防邊直隸辦理南路防務需人如張樹聲到任卽可令李鶴年交替赴湖北新任著曾國藩咨會李鴻章迅派妥員接署徐海道催張樹聲赴任以重職守將此由六百里各諭令知之○陝西巡撫劉蓉奏陝省叛產變賣充餉窒礙難行得旨卽著設法招墾納租認真籌辦務使野無曠土以裕國課爲經久之計不得徒託空言一奏塞責○癸未諭內閣林鴻年自簡雲南巡撫以來迄今一年有餘疊經催令赴任乃該員由川起程遲延日久始抵敘州於一切剿匪事宜辦理毫無把握茲

據崇實駱秉章奏滇匪李開甲等屯聚滇境林鴻年派員招撫該匪等藉詞投降意圖混入川境又札委李宜泰回湘募勇在途招搖滋事各等語林鴻年由雲南知府不數年擢任封疆宜如何激發天良仰副朝廷倚畀之重乃畏葸無能濫行招撫縱弁滋擾貽誤地方實屬溺職孤恩大負委任林鴻年著卽行革職以示懲儆○劉坤一奏臬司席寶田總兵劉勝祥在平遠東石大柘各率所部由良畚龍虎墟前進於四年十二月十九二十等日馳紮大坪堡鮑超於二十日由平遠之相公亭率師至距嘉應州城十餘里之平成鋪山子下一帶督催各軍縱橫掩殺追抵城根沿途殺斃四千餘名汪海洋與閩軍苦鬪受傷斃命羣賊推僞偕王譚體元爲首二十日復爲鮑超所挫二十二日席寶田劉勝祥進紮分水鄉等處賊於二十二日夜竄去臣當卽咨行鮑超劉勝祥兩軍窮

賊所之力圖埽蕩擬畱席寶田一軍暫駐大坪堡以資兼顧並飭全字湘勇平江長勝等軍勤加偵探嚴行防堵左宗棠瑞麟郭嵩燾奏汪逆伏誅後僞偕王譚體元代統其眾與胡瞎子等負隅死拒圍撲東路官軍營壘十二月十八十九等日高連陞黃少春王德榜各軍環逼州城東北之黃竹洋佛子高曹塘一帶紮營劉典劉明燈簡桂林李耀南等進紮西洋市副將賴長水陸三營進紮龍津橋各軍搭造浮橋夾河並進鮑超全軍於十七日抵州西北三十里之相公亭十九二十兩日在平成鋪山子下築壘廣東官軍李福泰亦至州西藍口令方耀鄧安邦至古塘坪列隊與鮑超爲犄角之勢十九日該逆率眾來撲粵軍方耀鄧安邦扼金雞石坳口賊分三路猛攻方耀等分投迎擊鏖戰四時斃賊百餘名二十日鮑超出隊譚逆復率悍黨分投來迎鮑超令唐仁廉等分三

路進剿先將中路之賊擊退左右路賊黨尙蟻擁而來譚勝達等奮力猛擊斃賊甚眾左路賊匪亦潰曾成武等復將右路賊匪擊敗乘勢追殺婁雲慶等橫截之賊益驚亂鮑超督各軍掩殺追至城下斃賊四千餘名生擒老賊二百餘名汪逆伏誅賊眾膽落又不得逞於西北臣宗棠料其必圖速竄飭令各軍迅速合圍自率親兵及楊和貴新右營前進二十三日行抵州東三十里之井塘據各軍稟報賊於二十二日夜間潛啟西南門由小密出黃沙嶂而遁胡瞎子當先譚逆及各賊斷後時劉明燈等立率所部疾趨黃砂嶂一路追截該處羣峯峭削一徑縈紆爲嘉應出新田大田右至豐順左至潮州之間道賊以數萬之眾冒死出險急不得前劉明燈簡桂林賴長馳抵泮坑斬尾賊數百名生擒三十餘名追過小密遇鄭紹忠所部遂向黃砂嶂併力追擊復斃賊二千餘名

生擒五百餘名高連陞等率隊入東門援勦餘賊僞佑將劉廷貴率三壘之賊赴黃少春軍前乞降另股千餘人赴劉典軍前乞降高連陞王德榜康國器各軍徑向黃砂嶂追勦鮑超督所部入城其過黃砂嶂之賊劉明燈等緣岸衝殺斬賊目二十餘名賊黨三千餘名生擒千餘名解散難民數千名高連陞劉清亮亦合兵縱擊斃賊極多直至分水坳劉明燈等因將士夜半出隊窮追竟日飢疲特甚乃收隊回營高連陞等整隊急追二十四日黎明及賊於大田我兵奮勇掩殺又追二十餘里賊屍枕藉賊黨乞降者萬餘人高連陞受之按斬叛勇頭目歐陽輝及逆首賴預薪之母悍賊猶越嶺狂竄我軍四路按殺又斃賊二千餘名高連陞劉清亮暫駐大田督隊按捕餘賊丁賢發生擒僞總統胡瞎子卽胡泳詳餘賊悉降始收隊而回王德榜一軍由黃砂嶂左路追殺二十三

夜間及賊於北溪僞先鋒眉天義曹玉科鈞天義楊侍如會天福何玉青僞天將彭大貴馬有玉彭大元劉得勝等率眾跪馬前泣求免死王德榜受之約四萬人鮑超所部二十三兩日由黃砂嶂左路追至北溪白沙壩何明亮黃矮子等仍思抗拒唐仁廉等分路奮擊將賊截作數段屍橫徧地共斃賊八千餘名逆眾見四面被圍始羅拜求生當將二萬餘眾一律兜擒查出僞忠誠天將何明亮僞大佐將何明輝暨叛勇頭目黃矮子等二十餘名及大小頭目七百三十四名訊明悉在軍前正法全股蕩平臣宗棠自可無須馳赴潮郡卽在松口暫駐將降眾分別辦理查各首逆譚體元被閩軍於黃砂嶂北槍傷墜馬落崖而死胡瞎子爲高連陞所部生擒何明亮黃矮子爲鮑超所部擒斬汪麻子亦中槍殞命悉數殲除無一漏網卽多年稽誅之積賊與近時投誠之叛勇本

地從賊之士亦皆撲滅無遺此次尤爲出力之浙江提督一等子爵鮑超等謹先行開列懇恩從優獎勵其餘出力各員并並請由臣宗棠查明擇尤彙案保獎傷亡陣亡之副將宋成祥等一併開列請旨飭部分別議卹上諭軍機大臣等本日劉坤一奏江軍進逼嘉應獲勝會同收復州城並左宗棠瑞麟郭嵩燾奏收復嘉應州城追剿竄匪全股蕩平詳細情形各一摺覽奏曷勝欣慰逆匪盤踞嘉應州城屢思衝突出竄經左宗棠督飭江粵閩三省之軍面面兜擊遂使該逆無路可竄一鼓殲除深堪嘉尚惟投降之人爲數過多必須妥爲遣散分別安插方免後患閩粵地方向多土匪積年爲患亦應搜捕淨盡永絕根株並飭地方文武將應辦善後事宜認真妥辦毋稍大意所部各軍自應由左宗棠會同瑞麟郭嵩燾劉坤一酌量分別遣留惟見在東南雖已肅清而捻

匪竄擾北路楚豫等省到處戒嚴防剿正當喫緊鮑超一軍前本令其馳赴北路助剿此時粵賊業已辦結卽著左宗棠飭令統帶所部迅赴楚豫之交聽候曾國藩調遣其江閩各路得力將弁兵勇有可調赴楚豫江皖助剿者並著曾國藩迅速函商左宗棠等酌量調往以期厚集兵力早殄逆氛左宗棠等仍當聽候曾國藩函商調派將士之信分別遣留不得先將得力諸軍概行遣撤以顧全局將此由六百里各諭令知之○諭劉蓉奏覆陳雷正綰情形飭令前赴穆圖善軍營並擊退竄擾隴州回匪籌濟甘省軍糧請催四川籌解捐銀楊能格誤事情形各摺片逆目馬泳和假冒官兵由固原繞路回至陝邊撲擾涇州經涇防將士勦力同心立時擊退剿辦尙屬認真見在固原等處回匪盤踞數萬意欲乘此春融氣煖紛竄陝疆著劉蓉督飭防邊將士實力堵禦毋稍鬆懈

固原平涼一帶爲陝省赴甘大路回逆屬聚其閒聲息阻隔蘭州
省垣米糧因此奇窘勢成坐困劉蓉見擬派兵由平涼進剿疏通
甘省糧路實能不分畛域力顧大局並著楊岳斌酌帶親兵數營
督飭曹克忠鞏昌之軍進擣固原與劉蓉所派劉玉興譚玉龍進
剿平涼之師前後夾擊先清東面以期疏通糧路雷正綰既經劉
蓉傳知令赴穆圖善軍營所有該提督部下將士及逃赴涇州之
親兵並平涼赴涇之勇丁均著楊岳斌與劉蓉飭令併歸譚玉龍
統帶俾有約束免致散而無紀劉蓉所參楊能格分撥各營糧餉
不均並營私侵蝕各情著楊岳斌確實查明會同趙長齡覆奏劉
蓉原片著鈔給閱看昨已有旨令楊能格回甘省臬司本任慶陽
糧臺事務令林壽圖接辦見在涇州需餉甚急卽著劉蓉迅飭林
壽圖撥解餉銀接濟毋稍延誤四川前辦勸捐援甘銀兩本日已

寄諭崇實賂秉章迅解十萬兩赴陝劉蓉所請撤去慶陽糧臺由該督擇員經理以免分歧之處著楊岳斌劉蓉會同酌度情形奏明辦理原片著摘鈔給楊岳斌閱看劉蓉仍當由陝省隨時籌撥銀糧源源接濟不得稍涉推諉所陳穆圖善偏於主撫情形本日已密諭該將軍令其詳慎斟酌不可偏聽誤事將此由六百里各諭令知之○諭前因甯夏收復所有善後事宜及納家牯安插回眾諸務疊經諭令穆圖善妥協辦理見聞靈州逆回亦有投誠之信該將軍務當熟察誠偽認真籌辦不可偏重議撫墮賊狡計雷正綰與周顯承等意見齟齬已令其酌帶隨身弁勇迅赴甯夏軍營隨同穆圖善辦理軍務穆圖善與雷正綰共事有年想必能勦力同心埽除賊匪惟該提督近來專以招撫爲事恐爲孫義和赫明堂穆三楊大娃子等所紿穆圖善總當遇事詳慎體察毋稍偏

徇庶操縱有權機謀不至宣洩雷正綰何日抵營並著穆圖善隨時具奏靈州爲首各逆必應擒獲正法其投誠之眾非將軍械馬匹全數呈繳不准收降經朝廷再三詰誠該將軍如不能悉心體會冒昧從事致貽後患必惟穆圖善是問此係密旨著不准一字洩漏將此由六百里密諭知之○諭崇實駱秉章奏官軍截剿大股滇匪獲勝並林鴻年招降滇寇貽誤情形各摺片滇邊苗土各匪兩萬餘眾銳意入川分撲敘州屢經胡中和督飭湘果各營以少擊眾疊挫兇鋒陣斬首要各匪殲斃賊黨六七千人該逆已敗逃出境由雲南威信司竄狂巖地方勦辦尙爲得手所有此次出力員弁勇丁及官紳團練著准其查明擇尤保奏毋許冒濫四川署建武營守備劉瀛因帶兵出防隘口致建武營汛地被匪占踞該營汛並無城池見經官軍克復著免其查辦仍畱營效力見在

敘永及合江綦江邊隘復有大股黔匪竄擾崇實等已飭李輝南
四營駐防瀘衛周達武馳赴合江防剿卽著崇實駱秉章嚴飭各
軍相機堵禦毋稍疏懈該署督等所奏滇匪李開甲等屯聚滇境
天星場經林鴻年派員特札招降挑選五百名發給口糧其餘遣
散見在該匪等明投暗叛攻破民堡圖犯川疆並該撫札委李宜
泰回湘募勇中途招徠滋事各等語本日已明降諭旨將林鴻年
革職雲南巡撫著劉嶽昭補授矣劉嶽昭前由川帶兵赴黔卽著
崇實等知照該撫迅卽疏通道路帶兵赴任並著崇實等飭令胡
中和嚴防叛匪毋令入境見據劉蓉奏稱陝省餉項奇絀積欠太
多難於兼顧涇州請飭催四川勸辦援甘捐輸銀兩等語該省防
剿緊要卽著崇實駱秉章迅卽督飭司道將前項勸辦援甘捐輸
銀兩趕緊催收十萬兩派員解交陝西以濟要需毋稍延玩將此

由五百里諭令知之○諭勞崇光奏行抵滇境日期及籌辦事宜並密陳岑毓英馬如龍不和情形各摺片滇省大局決裂已久必須有督撫重臣前往鎮撫整飭紀綱方能漸圖挽救勞崇光見已行抵平彝距省城僅止七站自應迅速前進且曲靖昭東大致尙覺稍安馬如龍復稟稱省城地方安謐尤當剋日進省以赴事機卽著勞崇光斟酌情形速行赴省將一切防剿撫綏各事宜妥籌辦理務期漸挽頽風以收撥亂反正之效該督旣稱馬如龍感恩圖報何以於馬如龍稟請迎謁時反阻其行恐此舉不免生其疑惑該督到省後務當宣布朝廷德意令其進剿杜逆力圖報稱林鴻年自簡任滇撫託詞逗畱大負委任本日已降旨將其革職雲南巡撫命劉嶽昭補授其雲南藩司仍著岑毓英署理著勞崇光傳知岑毓英奮勉立功去其偏隘之見以臻和衷共濟之休如該

署藩司始終不能領悟卽著據實具奏勞崇光所稱辦理滇事要在克復大理殲除杜逆等語實屬切中機宜卽著實力籌辦設法進兵蕩平醜類劉嶽昭到任需時勞崇光一身獨膺艱鉅責無旁貸務當澄心體察力籌整頓毋失機宜將此由六百里諭令知之○以劉嶽昭爲雲南巡撫岑毓英仍署雲南布政使由補用道署○以收復嘉應殲斃逆首譚體元賞閩浙總督左宗棠雙眼花翎還署兩廣總督將軍瑞麟花翎江西巡撫劉坤一頭品頂帶署廣東巡撫郭嵩燾二品頂帶浙江提督鮑超加一雲騎尉世職前浙江按察使劉典廣東提督高連陞雲騎尉世職劉典並賞三代一品封典提督唐仁廉譚勝達曾成武黃少春福建布政使王德榜黃馬桂餘加銜升敘有差予傷亡副將宋成祥等祭葬世職加等○予四川陣亡副將張大有等祭葬世職○乙酉諭軍機大臣等劉長

佑奏馬賊較遠北防稍鬆酌擬居中籌辦情形一摺匪距山海等關二千餘里內有邊牆之固外有三省騎兵防剿兼資自可無虞竄越該督擬暫行回省居中調度畱通永道英良在防並飭令徐廷楷暫回本轄地面著准其暫回省城清釐積贖並將南北兩防事宜妥籌兼顧仍督飭英良駐紮三屯營妥爲操防多設偵探儻該匪有內竄消息卽行飛報該督酌量出省至古北口地方亦屬要隘恐熱河餘匪潛蹤內竄著徐廷楷卽回本轄地面將迤北關隘倣照在北各口一律挑鑿深濠築建牆柵以臻周密文祥函商該督籌撥兵勇駐紮朝陽該督以孤軍遠涉饋運維艱聲援易隔不如將擬派之軍分紮口內更嚴戍守卽照所請行仍隨時酌度情形妥爲調度將此諭知劉長佑並傳諭徐廷楷知之○廣河南修武縣學額六名○丙戌諭軍機大臣等德英富爾琿奏逆匪竄

陷阿勒楚喀逼近省會見籌堵剿情形一摺逆匪王洛七等由雙城堡直撲阿勒楚喀署副都統永壽帶兵堵禦斃賊無數惟賊勢太重官軍被其圍裹以致潰散阿勒楚喀及拉林地方旋即失守五常堡亦被賊踞德英富爾孫未能先事防範實屬咎無可辭均著交部嚴加議處見在賊勢南趨逼近省會德英等惟當就見有兵力激勵拊循奮勇堵剿以待援兵文祥福興所派赴援吉林之定安等軍此時行抵何處並著迅催前進節節掃蕩與吉林之兵兩面夾擊毋令省垣重地稍有疏失文祥等前調之神機營官兵八百名已於日內陸續東行著酌量目下情形如定安等軍尙不敷用卽於盛京防兵及續調之官兵內酌撥若干迅赴吉林援剿以厚兵力著文祥等斟酌機宜妥籌辦理寶善前派馬隊千名慶經降旨令赴吉林交德英等調遣卽著寶善催令趕緊馳赴吉林

助勦不得稍有遲逾致干重咎富明阿病體已否痊愈吉林待援孔亟非得有知兵大員前往督勦不足以大挫賊鋒著富明阿與寶善籌商酌帶官兵卽日馳赴吉林勦賊務當仰體朝廷委任之意毋以病辭黑龍江防守事宜亦關緊要著文祥等傳知特普欽百日孝滿後卽日起程回任以重職守特普欽未到任以前寶善責無旁貸仍當力籌守禦毋稍疏虞將此由六百里各諭令知之○諭本日已降旨將李鶴年調補河南巡撫曾國荃調補湖北巡撫昨據劉長佑奏該督見擬暫行回省籌辦南北防務李鶴年著俟劉長佑回省後卽起程來京陛見後再行赴任曾國荃見在假期將滿舊病諒已就痊刻下捻匪竄擾湖北邊境防勦正當喫緊曾國荃素嫻軍旅朝廷爲地擇人正資倚任且由湘赴鄂相去甚近著曾國藩李瀚章卽行知照該撫迅速馳赴新任力圖報稱不

得稍存推諉之念有負屬望曾國荃舊部中有得力將弁兵勇並著酌量帶往湖北以資差遣將此由五百里各諭令知之○諭都興阿奏察看回目投誠情形一摺回目馬化澂既向雷正綰軍營具稟投誠當曹克忠進軍強沙家窩之際何不將疑懼情節稟明輒敢聚眾抗拒致雷營有金積堡之挫該回目等陽爲乞撫而詭譎反覆心志叵測總因尙未大創之故穆圖善務當酌度機宜勦撫兼施不得粉飾因循草率了事致貽後患儻偏於主撫懈惰軍心或縱令回匪復行勾結生事則穆圖善貽誤之罪斷難輕貸懷之愼之回匪孫義章何時投誠保至副將何以擅出告示交花馬池各處張貼且擅稱總統忠義等營名目著穆圖善詳查覆奏都興阿以撫局未定飭令各營及地方官於未經查明具奏以前不准回人擅自往來以杜勾結辦理甚屬認真穆圖善不可疏於防

範漫無稽察致誤事機毛卜拉邊口尙有匪擾經都興阿派兵剿散見在河東橫城花馬池定邊一帶後路均應嚴防穆圖善不得稍涉大意都興阿原摺著鈔給穆圖善閱看將此由六百里各諭令知之○吳昌壽降調李鶴年爲河南巡撫以曾國荃爲湖北巡撫調趙長齡爲山西巡撫仍以劉蓉署陝西巡撫○丁亥諭軍機大臣等伯彥訥謨祜等奏會商分道出邊剿賊馳援吉林請飭催捐輸馬匹並文祥福興奏剿賊獲勝情形各摺片賊匪盤踞昌圖廳之八面城並城西大窪一帶經文祥等飭令定安等軍冒雪進兵攻其不備並設伏誘賊出追斃匪甚多城賊震懾奔竄立將該城收復匪眾見向東北逃逸著文祥等卽飭令定安督兵跟蹤迅速追剿毋令得稍喘息逆首王起詭辭乞降冀圖緩師經文祥等嚴加飭絕立意主剿所辦甚合機宜所有此次剿賊出力員弁

著准其查明請獎廣甯防守尉扎朗阿經飭令帶兵豫紮大房申地方杜賊竄往東北之路乃敢託詞繞前迎擊致令殘匪他遁竇屬恇怯規避著卽革職不准畱營以示懲儆吉林勢甚危急文祥等務遵昨日寄諭飭令安定等酌量撥兵馳赴援剿並酌畱馬步數營駐紮長春應以防賊眾回竄之路伯彥訥謨祜見已行抵奉天哲里木盟官兵一千名已陸續到奉卽著該親王督帶由法庫邊門馳赴昌圖一帶察看情形與定安等軍會合進援吉林以壯聲勢如長春應以西有警仍卽折回防剿並著嚴催昭烏達盟及郭爾羅斯旗兵迅速派往以厚兵力一面知照卓索圖盟令其挑齊蒙古官兵在本境嚴防以杜賊蹤西竄之路蒙古各旗王公所捐馬匹未經解到者亦著伯彥訥謨祜迅催令其解赴該親王行營毋稍延緩春霖所帶洋槍隊經文祥等派赴興京防護布置尙

屬周密卽著照所議辦理將此由五百里各諭令知之○諭官文等奏官軍兩路剿辦髮捻並見駐漢鎮布置情形吳昌壽奏張總愚竄至明港驛飛調各軍進剿各一摺張總愚股匪由棗陽紛竄唐縣屬之郭灘一帶經姜玉順等緊躡追剿連破賊巢俱向白秋田九店竄去賴牛等逆擾及麻羅黃孝等屬境內梁洪勝敗賊於黃岡縣屬之街埠等處猝因賊眾兵單力竭陣亡其所帶之安民各營卽著官文委令劉盛國暫行統帶以專責成此次賊竄襄棗雖經擊退難保不悉數下趨亟應厚集兵力分路兜剿方能漸次掃蕩劉銘傳一軍前據曾國藩奏已於上年十二月間拔營赴鄂著該大臣催令該提督率所部十八營由羅山取道前進遇賊卽擊喬松年所派之王才秀四營是否已抵羅麻一帶著該撫迅催前進以厚兵力漢口係著名巨鎮官文旣經移紮該處卽著將防

守事宜妥籌布置俟各路援兵到齊卽當合力大舉以收聚殲之效張總愚見由桐泌折竄明港驛失昌壽已督帶安住保英馬步各隊進抵西平催令馬德昭蔣希夷等徑至遂平繞出賊前與姜玉順等軍互相聯絡以勦爲防卽著督飭各將士會合楚師縱橫夾擊迅殄賊氛河南巡撫已令李鶴年調補未到任以前吳昌壽責無旁貸仍當督率各軍妥籌調度不得存五日京兆之見稍形疏懈湖北巡撫已令曾國荃調補鄭敦謹著俟曾國荃到任以後再行交卸李鶴年卸任在邇著曾國藩懍遵前旨催令張樹聲迅速北上毋再遲延將此由六百里各諭令知之○諭張凱嵩奏官軍進規山澤連破賊營見籌乘勝攻勦一摺山澤逆首孫杜廣等盤踞谿崗稔惡阻兵此次楚軍湘勇奮力進攻數日之間蹙平賊村賊營二十五處挫斬極多實足以褫賊魄而揚軍威張凱嵩見

赴南甯卽著督飭劉培一覃遠璣王月亮等軍將附近村壘設法
攻克徑擣老巢並著迅撥一軍由宣化拊賊之背務使該匪兩面
受敵不能日久負隅方爲妥善至逆首孫芒廣必應拏獲正法毋
令乘間脫逃致稽顯勦將此由五百里諭令知之○以約束勇丁
不嚴革湖北總兵官王名滔職○予湖北陣亡總兵官梁洪勝祭
葬世職諡剛節○戊子諭內閣李瀚章奏臬司呈請開缺終養等
語雲南按察使趙煥聯著准其開缺見在粵逆已平貴州軍務未
竣仍著該員在湖南本籍帶兵防勦○己丑諭內閣楊岳斌奏甘
肅歲徵額糧擬請概復舊章以備軍食一摺甘肅歲徵起存上下
色糧四十八萬餘石耗羨糧七萬一千餘石前經已革護理陝甘
總督恩麟奏明於兵少糧多之撫彝張掖等廳州縣分別改徵折
色以備轉撥茲據該督奏稱近來甘省糧價昂貴每麥一石視前

所定折徵二千之價已增至十數倍以此價估撥兵丁不能餬口而州縣侵漁中飽培克愈重屆期轉撥則又任意枝梧以致兵糧不給儲積全無等語甘肅地方瘠苦軍民乏食自酌徵折色而後公私交困儲峙一空民賦軍糈兩受其弊自應迅復舊章以圖補救著照該督所請自同治五年起額徵正耗糧石仍歸本色並不分上下兩忙並著該督嚴飭各州縣潔己奉公務使惟正之供概入倉儲用備緩急儻有不肖牧令仍敢勒折侵那狃於積習卽著該督按照違誤軍需例嚴參治罪以重軍食而儆效尤○諭軍機大臣等楊岳斌奏甘省兵單調朱南桂劉連捷迅統所部赴甘援剿等語前因李瀚章奏劉連捷等軍勞勩日久當經諭令准其陸續裁撤見在甘省賊匪未平亟應添調勁兵以資援剿著劉坤一李瀚章查明朱南桂劉連捷兩軍是否已經裁撤抑仍在江境防

堵卽飭該二員迅率所部星馳赴甘援剿毋稍延緩其沿途口糧一切費用並著江西湖南兩省從寬籌撥俾利軍行將此由五百里各諭令知之○陝甘總督楊岳斌奏遵查胡大貴供稱於雷營勇變後率所部八百人請派秦國勝管帶實有其事至所稱譁潰之時力爲阻止則係一面之詞尙難遽信得旨著卽知會趙長齡催提雷恆李高起及蔣方直等歸案質信毋任狡展○諭官文等飭軍赴甘協剿並嚴緝軍營幘老會匪○諭李鴻章劉卹膏籌解甘肅軍餉○予甘肅陣亡總兵官余華龍等祭葬世職○以宋廷春爲雲南按察使

由迪西道遷

○庚寅諭軍機大臣等富爾琿奏剿辦

馬賊情形請飭奉省官軍夾擊等情一摺馬賊垂涎吉林偏近省會經佐領常喜等督帶馬隊並礮手步勇一千八百名在烏拉迪北雙陽通地方力行堵遏雖將賊匪擊敗而後股愈來愈眾尙在

白旗屯嘎牙河一帶直至巴彥鄂佛羅邊門內外盤踞富爾琿續帶馬隊二百名馳往烏拉援剿該處山徑叢雜賊眾兵單兼顧爲難又有小股匪徒兩路窺探希圖繞越僻徑詐襲省會見在該逆雖向巴彥鄂佛羅邊門竄遁難保不去而復來著富爾琿嚴督兵勇加意堵遏以防回竄並著德英嚴防省會毋稍鬆懈寶善前派赴援吉林之黑龍江兵一千名務當懍遵疊次諭旨嚴催速赴吉林富爾琿俟此項馬隊到時卽與德英商酌分撥應用匪徒儻被吉林兵剿退勢必復向奉省回竄文祥福興見已派兵出邊赴吉林援剿著卽飭令定安等視賊所向相機堵截毋令賊蹤回竄至賊匪老巢多在圍場大山之中非設法搜捕不能立清盜源並著文祥福興飭令定安等與富爾琿所部兵勇聯絡聲勢嚴密搜捕所請籌辦搜捕圍場兵餉及專員辦理餉糈之處著文祥等斟酌

情形辦理富爾琿原摺著鈔給文祥福興閱看將此由六百里各諭令知之○諭穆圖善奏甯靈軍務未竣都興阿馬隊先行撤動並都興阿接奉寄諭知照遲延各摺片覽奏曷勝詫異甯夏回人雖已投誠納家牖一帶回眾雖尙安靜然必須重兵彈壓方可資鎮攝而免疏虞都興阿何以不與穆圖善和衷商榷將杜嘎爾所帶馬隊撤赴定邊殊不可解見在都興阿已調補盛京將軍疊經降旨催令赴任所有甯夏軍營馬步各隊均令穆圖善統率調遣卽著都興阿懍遵前旨迅速起程前赴盛京將軍新任不准稍涉遲延杜嘎爾本係甯夏副都統職守所關豈可調赴他處仍著飭回甯郡聽候穆圖善調遣其餘各軍一併交穆圖善分別布置都興阿不得有意爲難致誤大局都興阿於兵勇入城鈔掠旣未能彈壓禁止且將杜嘎爾馬隊率行飭赴定邊辦理甚屬非是該

將軍先事已調任盛京穆圖善有督辦之責實無旁貸卽著懷遵
疊次諭旨將剿撫機宜及一切善後各事妥籌辦理儻偏於主撫
爲賊所愚而以都興阿辦理不善爲諉過地步必惟穆圖善是問
前據都興阿奏營務處鈔呈告示閱其前銜係統帶忠勇等營副
將孫義章所出事涉無稽當經諭令穆圖善查明覆奏此次穆圖
善片內但將都興阿查詢孫義章原文敘入而於孫義章銜名原
委並未聲敘明晰殊屬含混著仍遵前旨查明具奏不准一字徇
隱至所稱上年十二月初五日寄諭事隔多日都興阿始於咨文
內敘及恐以前延閣者尙多請飭查明等語著都興阿確切查明
因何知照遲延及從前有無閣壓之處迅速明白覆奏毋許回護
將此由六百里各諭令知之○是月豁免河南省咸豐九年以前
民欠錢糧暨停緩帶徵銀穀蠲免直隸安州等三州縣被水上年

額賦蠲緩廣西橫州等三十九州縣太平等二土州被旱被擾新舊額賦展緩山東濟甯等四十五州縣暨德州等四衛東平所屯莊被水被旱被蟲被風被雹被擾本年應徵額賦鹽蘆雜課湖南鄆縣被水失額田畝咸豐三年後未完額賦緩徵直隸開州等二十二州縣被水被旱被雹新舊額賦安徽壽州等四十州縣暨屯坐各衛被水被旱被擾新舊額賦漕糧湖北沔陽等二十州縣暨武昌等衛被水被旱漕糧新舊額賦雜課奉天三姓雙城堡歉收本年銀穀

二月辛卯朔諭軍機大臣等前因廣東嘉應州髮逆全股殄滅東南各省大局雖已肅清而豫楚捻匪奔突靡常蔓延數省特經諭令左宗棠等將江閩各軍暫行停撤聽候曾國藩函商將得力將士揀調北路江皖豫楚各營助剿並令鮑超先統所部馳赴鄂豫

聽候曾國藩調遣以期厚集兵力迅掃捻氛因思甘省甯夏雖經收復而回匪到處肆擾靈固及秦涼狄河等處盤踞勾結其勢甚熾楊岳斌所部兵勇頗單不敷防剿之用見在江閩各軍除應撥鄂豫江皖助剿外尙若干名可以調赴甘省軍營將領中何人可以派令帶往總以精銳得力爲主此時江閩粵東軍務已平浙江江西湖南亦應撤防自可將各該省餉項移作甘肅軍需之用嗣後江西浙江湖南每月可協濟甘省餉銀若干兩並協濟調赴鄂豫江皖助剿勇營餉銀若干兩鮑超一軍調赴鄂豫約有若干名楚北可協濟此軍餉銀若干兩江蘇省能否於見協甘省月餉外再行籌添若干兩均著官文曾國藩左宗棠李鴻章劉坤一馬新貽李瀚章妥籌速奏從前南省勇丁以甘肅地方瘠苦多不願往此時若將調赴甘省勇丁酌增餉銀若干或再將員弁兵丁之從

征西路者變通章程從優保舉當可樂於從事益加奮勉曾國藩
左宗棠李鴻章識見素優此舉是否可行卽著詳晰奏聞儻南勇
以水土異宜難於調赴甘省此外如有嘉謨碩畫可以統顧全局
者亦當各抒所見以期謀出萬全早蒞軍事有厚望焉廣東髮逆
雖平而土客匪徒互鬪蔓延糾結爲患方長且降眾土匪散處各
州縣伏莽甚多嘉應新降匪徒亦須籌畫安插均不可無得力兵
勇彈壓左宗棠仍當酌畱閩軍在粵不可概行遣撤並著該督仍
畱粵東辦理善後事宜毋庸遽回閩省肇慶等處滋事匪徒卽由
左宗棠派兵剿辦分別良莠懲勸兼施豫遏亂萌以副殷望嘉應
州前助髮逆戕害官兵之土匪亦應分兵搜捕淨絕根株毋畱餘
孽將此由六百里各諭令知之○諭張亮基奏川軍攻克天台山
賊巢並會同黔軍擊退遵義襲城號匪及貞豐州逆回出巢攻陷

永甯州城各一摺貞豐新城回匪以僞降緩我軍心各處官紳團練皆以勦回爲諱致該匪得逞狡謀乘隙竄陷永甯州城兇狡情形實堪髮指張亮基當督飭趙德光羅孝連畢大錫等各率所部分路進剿並飭興義等屬厚積團勇直取貞豐州城盡殲醜類毋得再行議撫稍事遷就至號匪雖經擊退難保不去而復來仍著督飭倪應復等嚴密防範毋稍疏虞劉嶽昭業經簡放雲南巡撫已令其節節掃蕩疏通道路張亮基當嚴檄黔軍會合該撫所統川軍實力攻擊肅清北路是爲至要將此由五百里諭令知之○撥河南光州營歸信陽協副將管轄移信陽州吳家店汛把總駐明港驛設經制外委一駐吳家店汛額外外委一駐蕭曹店移信陽州守備駐確山縣城確山溝竹汛外委駐新安店遂平汛外委駐溝竹汛設千總一駐遂平縣城○壬辰予江蘇殉難通判彭仁

中祭葬世職○癸巳諭軍機大臣等李瀚章奏請令貴州藩司暫緩赴任辦理貴東軍務一摺黔省下游羣盜如毛苗教各匪時伺楚邊李瀚章見飭周洪印徑取寨頭以爲節節進擣之計第懸軍深入非有黔省知兵大員駐紮會剿難以見功該撫擬令新任貴州藩司兆琛稍緩赴任專辦貴東軍務由楚西馳紮鎮遠選將練兵與楚軍共圖進剿所陳尙合機宜張亮基於黔省下游頗有鞭長莫及之勢湖南援黔之軍屢次中輟迄未竟功兆琛既熟悉該處形勢責令專辦下游必克呼應較靈客兵主兵聯爲一氣卽著該撫傳知兆琛暫緩陸見卽由沅晃馳赴鎮遠辦理軍事務與周洪印等軍聯絡聲勢埽蕩而前以收破竹之效粵東髮逆旣平湘省東防已鬆李瀚章尤當抽撥勁兵越境入黔以資厚集趙煥聯前已有旨准開雲南臬司之缺仍令在湖南本籍帶兵防剿並著

該撫飭赴湘黔邊境與兆琛周洪印等督兵進取毋任諉卸張亮基仍當嚴飭下游地方文武及在防兵勇與楚軍併力夾擊並聽兆琛調遣以期早靖邊陲無負委任將此由五百里各諭令知之○命兩淮鹽運使丁日昌馳赴廣東隨同將軍瑞麟辦理中外交涉事件○予浙江陣亡副將何萬華等祭葬世職○甲午嚴限浙江廣東江西湖南等省籌解協滇欠餉○諭李鴻章等籌濟東省運道○諭王榕吉迅解徐州軍營協餉○乙未諭內閣前據都興阿穆圖善先後奏報甯夏回眾投誠郡城業經收復並據穆圖善奏稱該回眾於上年十二月初二日將城池圩卡全行撤空各堡回人俱移往納家牖一帶繳出槍礮等件將倡亂之逆首納萬有送營正法官軍入城駐紮乃都興阿復將回目保立等誅戮兵勇乘機肆行搶殺當以情節參差未卽查辦茲復據穆圖善奏該處

回眾實係真心悔罪接據都興阿信函亦自認冒昧孟浪鈔錄呈覽等語都興阿督辦軍務於勦撫機宜毫無定見且於兵勇入城肆掠未能彈壓禁止致與穆圖善辦理兩歧實屬錯誤著交部議處至回眾拒城抗官固爲國法所必誅惟朝廷以好生爲心其中果有被脅勉從真心悔罪者自應寬其既往概予保全前經諭令統兵大臣但分良莠不分漢回諄諄告誡至再至三此次都興阿辦理不善業經加以懲處所有甯夏投誠回民卽著穆圖善妥籌安撫俾得各安生業復爲良民此外各處回眾如有能捆獻首逆誠心反正者亦准一體免其前罪妥爲安插用示朝廷覆載無私至意○諭軍機大臣等李鴻章吳棠奏理漕須先理河請飭擇要濬築一摺據稱東省河道乃行漕最要關鍵上屆東省所挑淤運兩屬各工不無多費而米船仍係繞湖而行本屆糧艘自應入湖

行走所有十字河等處挑工大可酌量停辦僅將東省下游及進湖處所量加疏濬並將沈家口張秋鎮淤墊段落認真挑濬似輓運不至阻滯其本屆米石無多止可擇要挑築或於南壩頭口門埝上酌作鉗口草壩數道各等語見在江省已遴員分投購米雇船漸有頭緒亟宜將運道豫籌濬築方免臨事周章前據閻敬銘奏漕船入運全無把握張之萬奏南壩頭等處運河挑挖深淺皆有可虞各等語東省運道久經淤滯疏濬自屬費手惟見當辦理新漕之際豈可任令河道廢弛著張之萬閻敬銘丁寶楨按照李鴻章等所擬妥籌辦理不得畏難推諉致誤漕行李鴻章吳棠亦當隨時體察情形與張之萬等悉心咨商務臻妥善李鴻章等摺著鈔給張之萬等閱看將此諭知李鴻章吳棠張之萬閻敬銘並傳諭丁寶楨知之○諭都興阿奏移交軍務並請將杜嘎爾帶赴

奉天等情穆圖善奏甯郡回眾仍復求撫並陳都興阿辦理錯謬鈔錄都興阿信函呈覽各一摺都興阿前已調補盛京將軍見在吉林奉天防剿正形喫緊該將軍務當趕緊起程就近來京陛見後卽行馳赴新任辦理軍務毋得稍涉遷延杜嘎爾帶隊旣能得力著准其隨同都興阿前往奉天奉天軍營本有吉林黑龍江馬隊杜嘎爾到彼自可交令管帶甯夏軍情尙未大定靈固等處剿辦回匪在在需兵都興阿所請抽帶甯夏軍營四起馬隊赴奉之處著毋庸議納家牘回民前在甯夏城中被官兵殺掠見復赴穆圖善軍營懇請投誠情詞哀切出於至誠著穆圖善妥爲安插毋令失所都興阿交卸起程後穆圖善於甯夏軍營事務責無旁貸該處漢回人心尙未大定自應妥籌綏輯並須畱意隄防不可稍涉疏忽俟甯夏善後事宜辦有頭緒再行進圖靈州至回眾投誠

時務當責令將戕官踞城首要兇犯捆獻正法並將軍械馬匹交出其脅從回眾酌量情形果係真心悔罪方准受降不可輕率漫無區別致爲奸回所紿懷之愼之甯夏將軍本任事務卽著穆圖善趕緊接辦駐紮花馬池之直隸官兵二千名著都興阿穆圖善酌量情形能否回直歸伍之處妥籌辦理將此由六百里各諭令知之○丙申諭軍機大臣等林壽圖奏俟交替後馳赴慶陽並請收回成命毋庸專摺奏事各摺片所奏雷正綰固原三營陸續潰散數百人其迅字五營隨撥隨逃平涼之營逃至涇州者亦眾雷正綰僅存百餘人該提督咨文乃有十六營之語多寡相懸奚啻倍蓰該提督之咨固不足信卽秦國勝等之函亦恐有傳聞之誤仍著楊岳斌劉蓉確切查明以昭覈實據稱固原回逆聚眾數萬將由新城奄至鎮原繞出涇州東趨邠州北集原窺伺陝疆等語

不可不豫爲之防楊岳斌見已出省卽著督飭所部相機前進遇賊卽擊毋令闖入陝疆並著劉蓉嚴飭防軍認真堵剿毋得稍有疏懈林壽圖擬俟交卸藩篆後馳赴慶陽聲稱糧餉轉運恃西安爲後路而慶陽係偏隅僻壤請飭按署藩司通籌妥辦俾免跋扈前憲後之虞慶陽糧臺前經劉蓉奏請裁撤當交楊岳斌等酌度情形具奏該糧臺是否可以裁撤歸併西安省城能否兼顧仍著該督會商劉蓉奏明辦理至林壽圖奏稱綜精臺者不宜專摺奏事嗣後擬請督撫代爲具疏以一事權等語所見亦是卽著照所請行楊能格奏糧餉兩竭急籌補救請推廣捐輸章程以拯危局並將所擬條款開單呈覽一摺著楊岳斌覈議奏聞再降諭旨原摺單著鈔給楊岳斌閱看又片奏軍糧緊急請飭陝西撫臣飭屬按月運解倉糧並籌撥腳費銀兩等語著將原片鈔給劉蓉閱看卽

由該撫妥籌辦理將此由五百里諭知楊岳斌劉蓉並傳諭林壽圖楊能格知之○丁酉諭內閣已革提督田興恕業據崇實等委員於上年十月間押解帶病起程取道川北解至陝西轉解甘肅見在行抵何處著四川陝甘總督陝西巡撫等迅速催令押赴戌所不准藉端逗畱○諭軍機大臣等明緒奏孤城軍民飢困日久各路援兵不至危在旦夕一摺前因伊犁軍情危急疊經諭令成祿等迅速出關援剿見在該回匪於伊犁城外四面環攻該城東北兩面尙可勉強支持而西南兩路空虛直無兵可以分撥堵禦局勢萬難久支亟應添兵援救以解倒懸著楊岳斌嚴催成祿鶴齡懷遵疊次諭旨各率所部趕緊出關兼程前進協同剿洗速解伊犁之圍經此次諭知之後儻成祿鶴齡仍前玩泄再行託故逗畱遲延不進必治成祿鶴齡以貽誤之罪和闐辦事大臣奎章簡

放已久迄今尙未到任著楊岳斌嚴催該員迅赴新任毋再遲延
干咎將此由六百里諭令知之○諭明緒奏伊犁軍務危急請飭
明誼挑派蒙古馬隊官兵救援一摺伊犁情形危急日甚一日著
明誼卽行挑派蒙古馬隊官兵六千員名由該將軍親帶取道塔
城迅赴伊犁救援儻官兵不能如數派撥務將駟馬認真備辦三
千匹專派練達敏捷之官兵先行借道俄國臺站趕緊護解伊犁
以顧急需必須解至伊犁大城交明後方准銷差烏科二城與伊
犁唇齒相依明誼務當妥籌應援如所需口糧不敷卽著一面調
派一面奏聞不得藉詞推諉致干咎戾原摺著摘鈔交給閱看將
此由六百里諭令知之○諭總理各國事務衙門奏稱江甯還堂
一事前經李鴻章咨據江甯府稟稱該國不願城外擇地抵換應
令自來江甯與該處官紳面議茲據法國公使照會內以並無完

結之信爲詞請以三箇月爲限仍請飭令李鴻章妥籌速結等語金陵教堂業經該署督允議抵還如能於城外擇地抵換卽著李鴻章爲議結儘該國主教必欲在城內建堂該署督亦當於城內另擇一區給與修造總期彼此相安羣情帖伏毋任地方官借詞遷延該署督熟諳洋務必能力持大局於此事迅速完結以示懷柔原片著鈔給閱看將此諭令知之尋奏據江甯府知府涂宗瀛稟稱與教士雷遜駿辯論數月仍遵前說以城內小桃源空基一處查還並將該教士見寓小豐富巷舊屋及旁基稍爲加寬給與棲身均繕立漢文洋文合同互換結案下所司知之○諭總理各國事務衙門查還陝西教堂請飭速辦一摺各省查還天主堂舊址原係按照和約辦理自應早爲完結陝西省已歷五年尙未辦結屢經總理各國事務衙門咨催該撫僅以西安教堂並無實在

憑據未能照辦城固教堂則因主教未到莫可籌商等詞聲覆今該國公使以陝省因循未辦請立限六箇月期內交還著劉蓉迅飭該地方官將查還西安城固原有教堂速行設法辦結並立予限期毋得再事遲緩此係照約辦理事件該撫務當認真籌辦將此案及早了結以符條約原摺著鈔給閱看將此諭令知之○戊戌諭軍機大臣等伯彥訥謨祜奏剿辦馬賊生擒匪首並請禁濫撫暨請將黑龍江馬隊千名先歸統帶各摺片文祥奏派兵援剿吉林一摺賊匪大股雖渡江東竄而遼河東西兩岸尙有小股多起沿村裹脅隨在搶掠經伯彥訥謨祜督帶蒙古官兵馳往昌圖派兵在遼陽窩鋪一帶追剿殺賊數十名並將賊首王洛疙疸等三名生擒正法搜獲賊匪三十餘名內有賊首隋同令等十七名一併正法該親王見已馳抵八面城籌畫前進著卽督帶所部赴

援吉林惟當詳慎布置不可輕率從事致有疏虞黑龍江馬隊千名已據寶善奏報起程仍著該署將軍嚴催速進見在賊股竄至烏拉距吉林僅數十里該處情形緊急自應令黑龍江馬隊就近由德英調遣防範以救眉急未便再令繞赴八面城一帶歸該親王統帶所有昭烏達盟蒙古官兵卽著伯彥訥謨祜嚴行檄催迅赴軍營歸該親王調遣應需軍餉仍著文祥籌撥源源接濟伯彥訥謨祜所稱賊匪不可輕議招撫實屬深悉弊源著文祥福興德英寶善詳審情形斟酌辦理不可輕率收降致滋後患原片均著鈔給閱看博崇武定安等軍已陸續由長春廳進援吉林著卽與伯彥訥謨祜及黑龍江馬隊三面會勦迅殄賊氛八面城一帶餘匪俟劉榮合馬隊到奉後卽飭令赴昌圖一帶駐紮搜捕烏拉賊股前據富爾琰奏稱被官兵擊退此股賊匪係王洛七爲首見在

情形若何有無分散回竄之處著文祥探明具奏本日據德興阿奏聯捷軍營撤回馬隊官兵多有嗜好不自愛惜並聞黑龍江兵丁近多吸食洋煙者傳染日深關繫非細請飭禁止等語著寶善於所屬各城嚴加禁止務期一兵得一兵之用不至日就頽廢奉天吉林官兵內如有沾染惡習者著福興德英一體嚴禁有犯必懲俾得振刷精神悉成勁旅將此由六百里各諭令知之○己亥諭軍機大臣等昨據明緒奏伊犁回匪鴟張情形危急設北自塔城竄入烏科兩城處處勾結騷擾其害不可勝言等語因思自新疆回匪變亂以來西路各城間風四起到處蔓延伊犁被困岌岌可危設該匪乘勢竄突則北路極形喫重塔爾巴哈台及烏科兩城所設額兵軍火不齊操防久已廢弛又兼糧餉缺乏殊難枵腹荷戈前經戶部奏催同治五年分新疆南北兩路經費酌撥山西

丙寅年地丁銀十萬兩山東丙寅年地丁銀十五萬兩河南丙寅年地丁銀十五萬兩均由山西解至綏遠城從北路草地解至烏里雅蘇台分撥應用當經降旨令山西山東河南等省照數撥解見在北路防務喫緊待用孔殷著閻敬銘吳昌壽王榕吉丁寶楨懍遵前旨迅速籌解不得稍事遲延見在明緒因事機緊迫請調烏里雅蘇台蒙古官兵六千員名一應軍火尤須早爲籌備山西距該城較近著王榕吉趕辦火槍戰箭及隨槍箭什物並一切火藥鉛丸等件運交綏遠城由綏遠城從北路草地解至烏里雅蘇台交明誼等接收撥給蒙古官兵迅速起程赴援伊犁王榕吉於此項軍火務須寬爲籌備足敷六千人之用烏里雅蘇台爲北路咽喉明誼等身膺專城責任綦重科布多塔爾巴哈台均係北路扼要之區需餉均甚緊要一俟餉銀陸續解到卽由明誼等酌定

數目分給各城一面咨照該大臣等迅速迎提應用該大臣等務
各督飭兵丁日夜訓練俾成勁旅以備緩急儻泄沓不知振作致
兵丁仍前疲弱貽誤事機必將該將軍大臣等重治其罪懍之將
此由六百里諭知明誼麟興車林敦多布廣鳳奎昌閻敬銘吳昌
壽並傳諭丁寶楨王榕吉知之○辛丑諭軍機大臣等官文鄭敦
謹奏官軍克復黃陂縣城暨請仍畱馬德昭在楚會剿各摺片捻
匪麇聚黃陂城內及新洲岐亭宋埠一帶經楚省官軍會同劉銘
傳等軍合力圍攻殺賊甚多其奔竄出城者又被我軍分路追殺
當將黃陂縣城收復在事出力各軍著官文等擇尤酌保毋許冒
濫見時敗逆均向安麻新洲一帶大路竄去亟應乘勝殲滅以除
後患官文等已飭豫楚各軍跟蹤追剿並飭王才秀由麻城一路
前進咨劉銘傳就地馳赴新洲等處迎頭攔截與追軍前後夾擊

務卽嚴檄各軍奮力兜擊迅殄逆氛毋任再行紛竄復致蔓延張
總愚股匪見由信陽竄往確遂一帶與賴牛等逆相距較遠一時
尙難句合著吳昌壽督飭豫省馬步各軍與姜玉順等軍互相聯
絡奮力夾擊以期隨地剪除早日蕆事馬德昭一軍入楚後尙能
得力自應仍畱楚省會剿蔣希夷一軍吳昌壽業已調回舞陽一
帶豫楚兩省軍務均屬喫重馬德昭當視何路喫緊卽由何路進
剿一應進止著官文等與吳昌壽商同辦理總期與軍事有裨不
可稍分畛域將此由六百里各諭令知之○壬寅官軍復湖北黃
陂縣城諭官文等會同吳昌壽兜剿張賴等逆○癸卯諭內閣卞
寶第奏請開缺回籍養親等語順天府府尹職守緊要卞寶第向
來辦事尙屬妥協該員之母亦已迎養在京卽可隨時定省藉遂
孝思所請開缺回籍養親之處著毋庸議○諭曾國藩奏查辦湖

團分別畱遣並酌籌善後事宜一摺據稱江蘇銅沛兩縣濱湖田畝前於咸豐元年閒因黃河豐工決口時被水淹沒嗣因黃水退涸變爲荒田經前任南河河道總督庚長設立湖田局招墾繳價輸租充餉山東曹濟等屬各縣客民遂陸續前赴該處勸立湖團相率墾種屯聚日多銅沛土民於水退歸鄉後因舊時田產被客民所墾日相控鬪疊釀巨案並有刁劣生監設局斂錢屢以湖團通捻謀逆等詞誣控希圖將客民概行驅逐見經訊明分別良莠辦理並擬設立同知及籌辦善後章程三條等語所辦甚屬允協銅沛等縣土民田產因被客民占墾控鬪不休固出於情之不得已惟當地方官立局招墾時該處土民並不呈請認還舊產迨客民出貲認墾變荒爲熟始行爭控亦無以服客民之心且所墾之田亦有官荒地畝土民被占田產並無如許之多其聚眾構訟者

亦非田產被占之戶見經曾國藩查明將上年容留捻匪之刁王兩團客民驅回山東本籍所有該兩團退出田畝六百五十餘頃抵還侵占之數計已有贏無絀凡有印契糧票之失業土著各戶均准其報官認種以昭平允其餘安分各良團均不得概行驅逐所墾地畝均准其永爲世業該處土民不得再行爭控經此次清理之後該地方官遇有土客爭控之案但當分別良莠不得復存土客之見以期永斷葛藤其沛縣激眾構訟之生員王獻華著卽革去衣衿以示懲儆嗣後再有土著刁劣紳民聚眾誣控希圖斂錢肥己及客民中有恃眾逞強滋事者均著該地方官從嚴懲辦通匪在逃之客民王長振著曾國藩嚴拏務獲正法所請將徐州同知移紮該地方以資彈壓之處著該部議奏尋吏部議旣據奏稍徐州境內必須駐有廳員彈壓應如所奏辦理將徐州同知移

紮該處以制要害從之○諭軍機大臣等曾國藩奏查辦湖團分別畱遣並酌籌善後事宜及起程赴周家口派兵駐徐防賊東竄各摺片湖團爭利尋仇積釁已久此次曾國藩秉公查辦將王刁兩團全數逐回山東並酌定善後事宜三條以期各安生業永息爭端所辦甚屬妥速已明降諭旨均照所請辦理驅回山東之團見經設局發還地價並許給一半熟麥自不至窮無所歸第人數太多良莠不齊一旦失業回籍易滋事端著閻敬銘丁寶楨督飭該處官員認真經理撫綏安輯毋得稍有疏虞至安靜各團地方應如何設官彈壓按照善後事宜次第經理之處著李鴻章吳棠督飭徐州道府各官隨時妥辦務臻萬全張總愚股匪見在西平遂平一帶意欲竄入山東曾國藩已飭劉松山等仍駐徐州湖團等處以遏竄突其東省防剿事宜著閻敬銘丁寶楨督飭在事各

軍嚴密偵探力籌防堵王刁兩團從前既有容賊情事此時驅逐回東尤應防其勾結捻匪並著豫爲防範不得稍涉大意朱南桂前經楊岳斌奏調統帶舊部赴甘見在該總兵所部既經遣散能否前赴甘肅或由曾國藩另派一軍赴甘之處著斟酌情形妥籌辦理昨據官文奏稱官軍收復黃陂賊匪敗竄安麻新洲一帶咨劉銘傳迎擊等語著曾國藩嚴飭劉銘傳督率所部視賊趨向會合楚豫各軍前後夾擊以收聚殲之效將此由五百里諭知曾國藩李鴻章吳棠閻敬銘並傳諭丁寶楨知之○諭穆圖善奏通籌甘省軍務全局並陳都興阿殺降失信及馬隊四營毋庸赴奉擬令杜嘎爾赴任各摺片納家牘回民具稟投誠靈州金積堡回目馬化澂亦曾兩次具稟求撫真偽尙未可定卽著穆圖善懷遠疊次諭旨妥爲籌辦務令將首要各犯設法縛獻方准投誠斷不可

專意主撫致爲奸回所結見在甯靈尙未大定甘肅近省之秦王川永北河一帶肅甘涼等州郡均有匪蹤肆擾該將軍所稱甘省軍務宜先甯靈而後河狄先內地而後新疆自係一定辦理穆圖善務當將甯夏善後事宜妥爲辦理並將靈州回匪迅速辦竣再圖移師進剿雷正綰前經諭令馳赴甯夏軍營茲據穆圖善奏稱甯郡各部兵勇已足鎮撫請飭雷正綰剿辦甘肅近省回匪免致勾結爲患等語卽著穆圖善與楊岳斌體察情形斟酌辦理新疆需兵緊要成祿一軍著楊岳斌仍遵前旨催令出關穆圖善奏責令曹克忠剿辦鞏昌股匪俟省南安堵再行移師平固一節見在鞏昌業已解圍著咨商楊岳斌妥籌調派楊岳斌見已出省赴涇務當督飭各軍將各路回氛次第掃蕩以期肅清關內毋稍延緩前已降旨諭令都興阿將馬隊四營仍畱甯夏並將杜嘎爾開缺

諭令隨同都興阿前赴奉天甯夏副都統已著金順補授卽著穆圖善將馬隊四營妥爲調派甯夏一切事宜俟金順到任後會商妥辦將此由六百里各諭令知之○予安徽傷亡總兵官夏金標江蘇殉難州同銜唐守忠等祭葬世職○曾國藩奏臣定於二月初九日啟程由兗濟歸陳繞赴周家口就近調度並飭劉松山會同張詩日續赴湖北助剿漢黃一帶久已通飭遵照頃接李昭慶白柘城來稟據稱張總愚股匪見在西平遂平一帶意欲竄入山東各路生擒賊供皆稱賊圖東竄因改飭劉松山等仍駐徐州湖團等處俟東路無警再行西征赴鄂報聞○甲辰左宗棠奏據福建延建邵道康國器稟稱十二月二十三日追賊至豐順縣北白水寨一帶擒斬無算生擒逆渠洪秀泉之壻僞金王鍾英僞幼陪王譚標僞懷王周春之姪周祉幅僞朝將黃松僞佐將何淐勝黃

蘇寶解營經臣親訊明確軍前正法浙江提督鮑超續於降人中
盤獲首逆汪海洋養子汪長林偽王宗汪起賢福建藩司王德榜
續於降人中盤獲汪海洋之妻張氏訊明正法又獲偽列王李海
青偽天將粟時之偽神將劉汶渭等賊目三百餘名粵軍副將鄭
紹忠搜獲偽贊王賴阿養朝將劉必勝及悍賊一百九十六名粵
軍副將鄧在倫等亦搜獲逆目王友才江德勝王亞剴等十數名
均立予斬決此外兇惡素著者訊明從嚴懲辦其老弱及被脅日
淺者委弁遞送各原籍安插婦女幼孩雇海船解送閩浙由各原
籍紳商留養轉覓其親屬領歸其壯丁五千餘名江西安徽湖北
各省民人督派各營安插給以口食帶出粵境陸續資遣此次搜
捕餘匪出力各員弁謹分別開列奏請獎敘臣頻年效力戎行未
遑安處精力日減左手左足常患麻木酸楚艱於乘騎昨由平和

趙程入粵嶺路墜馬左腕疼痛益劇自念犬馬之齒甫五十又五
不應衰憊至此惟不及早調治恐漸成偏枯之證擬於本月二十
四日班師回閩由水路至潮州取道詔安以就坦易到閩後急爲
調理如能速痊不敢乞假瀆陳又奏僞奉王黃十四卽黃朋厚於
上年十二月初間密遣人赴劉典軍前乞降劉典許之仍飭覘汪
逆動靜隨時稟知十二日之戰復能密約夥黨勿抗官軍自取誅
勦指揮其眾棄械款營就撫是其歸誠在先於解散賊黨機宜頗
資其力可否免罪並賞給守備銜之處出自 天恩又奏准署兩
廣督 臣瑞麟來咨以東路肅清催高連陞赴廣東陸路提督本任
令其將部曲交各將領接管聽 臣檄飭凱旋 臣維高連陞一軍糧
餉均歸閩浙糧臺給領廣東僅解過該軍餉銀四萬兩茲因軍務
告竣督 臣催高連陞赴任所部咨 臣檄飭回閩其意不過以此軍

之餉始終推諉於閩耳如果此次軍務告竣後廣東所收降卒各軍所散勇丁各屬通誅土匪能保其不復滋生事端則臣之豫留高連陞一軍誠爲過慮若令其隻身赴任責以驟難整理之制兵靖不可數計之匪寇勢恐不能計見在高連陞所部除撤遣旋閩外僅留五千餘人每月需餉不過三萬餘兩本年二月起始歸廣東支應並非強以所難如謂仍應歸閩支領則廣東應解協閩之餉約尙有三十餘萬兩卽以此款悉數移充高連陞軍餉以閩餉濟閩軍約足一軍之需一年之後諸患漸平陸續裁撤此軍亦未爲晚合無請旨飭下廣東督撫臣熟思審處仍飭高連陞帶所部赴任之處出自聖裁上諭內閣此次官軍按捕粵東餘匪盡軍務告竣班師回閩所有出力之福建延建邵道康國器著賞給該員三代二品封典遊擊李元順著俟補副將後以總兵升用

副將鄧在倫著賞加總兵銜知縣錢誦清著以同知仍畱廣東補用以示鼓勵僞奉王黃十四卽黃朋厚自上年十二月乞撫後密覘賊情隨時稟報復能解散賊黨棄械投誠尙屬真心效順黃朋厚著免其治罪並賞給守備銜○諭軍機大臣等粵東之賊全股蕩平後復經康國器等追捕餘匪並於降人中接獲逆裔及悍賊數百名立予斬決老弱壯丁分別賞遣辦理甚爲妥協該督以墜馬致舊病增劇見於本月二十四日班師回閩著於到閩後安心調理期於速痊以慰廑繫左宗棠凱旋後粵省安插降卒按誅土匪善後之事方多正當畱紮勁兵以資鎮遏瑞麟旣咨催高連陞赴廣東提督本任何以反令左宗棠將其部曲檄飭回閩該署督徒爲推諉該軍餉需起見曾不爲地方計殊昧事機該省民風著名刁悍平日所養制兵毫不得力徒耗餉需儻閩軍凱撤而降卒

土匪又復滋生事端重煩兵力該署督其能當此重咎耶高連陞所部五千餘人計每月需餉不過三萬餘兩卽著左宗棠檄飭該提督帶所部赴任月餉由瑞麟郭嵩燾按月籌給不准絲毫短少藉欠致有掣肘之患俟該省諸患悉平伏莽淨盡再議裁遣劉典覓在請假省親該臬司久歷戎行素稱得力若令投閒殊屬可惜著左宗棠諄飭該員於省親後卽行銷假應派往何路軍營帶兵剿賊並著左宗棠斟酌奏聞將此由六百里各諭令知之○予伊犁陣亡領隊大臣達春泰等祭葬世職○乙巳諭劉長佑閻敬銘等籌解伊犁軍餉○調瑞常爲工部尙書文祥爲吏部尙書○丙午諭軍機大臣等近聞直隸藩司唐訓方於公事未能力求整頓遇事健忘惟候補道卞寶書之言是聽該道不知檢束有藉勢招搖情事藩司表率僚屬責任綦重豈容他人干預致令事權下移

劉長佑見在回省著卽詳細查察據實奏聞毋得瞻徇諱飾代人受過將此密諭知之○諭有人奏疆吏玩兵侵蝕縱暴殃民請另簡賢能以綏巖疆一摺據稱署貴州巡撫張亮基莅任伊始尙知愧奮數月以後與督臣勞崇光互相齟齬近復信任家丁子弟濫利營私侵蝕湖南黔捐不下三十萬兩四川已革知縣王應昌送給該署撫三千金遂攜帶至黔冒功保薦無惡不作張亮基始終袒護該署撫之子張臚壽擅作威福知縣茹含章厚贄拜門委署畢節劉登仁趙文會納賄買缺該署撫佯爲不知張臚壽至今亦未回籍家丁白振采濫保官職官紳憤恨請飭查辦等語張亮基被參各節如果屬實殊與黔省地方大有關係著張凱嵩卽飭嚴樹森馳赴貴州按照所參各情嚴密確查據實具奏不准稍涉徇隱原摺著鈔給嚴樹森閱看嚴樹森起程後廣西臬司著張凱嵩

派員署理將此諭知張凱嵩並傳諭嚴樹森知之○加賞晉濟堂
功德林煮賑米二百石展期兩月○丁未諭內閣前因都興阿督
辦甯夏軍務於勦撫機宜毫無定見且於兵勇入城肆掠未能彈
壓禁止降旨將都興阿交部議處茲復據穆圖善奏稱都興阿帶
隊入城百姓猝遭焚掠城內精華蹂躪淨盡回眾所交銀錢米糧
亦被燒搶不惟三寺良回死傷太眾卽漢民甫經歸家者大半皆
遭屠戮幾致釀成他變各等語都興阿於回眾獻城之後帶隊入
城任令兵勇肆行搶殺以致死傷過眾民遭荼毒實屬辦理乖謬
著再行交部議處以示懲儆尋議以革職治罪得旨著加恩改爲
革職畱任○諭軍機大臣等德英奏分兵勦禦西南股匪省會仍
形喫緊富爾孫奏長春廳會遇京兵見仍分路截勦各一招賊匪
竄撲長春廳退踞大嶺富爾孫馳赴該廳與定安之軍會遇定安

卽於初三日向八家子一路追賊進剿富爾琿亦於是日向伊巴丹站進發其時該站之孫九工等股匪紛紛入山經依克唐阿等追及於三道濠地方殲除數十名餘匪翻山奔竄見在黑林鎮等處股匪經定安等追剿又自五臺子直奔大孤山赫爾蘇站一帶富爾琿擬卽馳赴葉赫一路迎剿卽著督飭依克唐阿等馬步各軍探蹤截擊毋任狂竄定安等軍業已由黑林鎮一帶進發著文祥福興飛檄該副都統等會合吉林官兵分道截擊迅速圖功毋稍遲誤德英摺內所稱見據探報西南各股賊匪有竄赴圍場山邊村屯騷擾者亦有轉竄西北長春屬境者仍著德英商令富爾琿察看賊勢輕重妥籌防剿省城防守事宜並著嚴密籌辦毋稍疏懈黑龍江所撥馬隊一千名早經奏報起程何以尙未到吉著寶善飛催前進不准稍有延緩富明阿於何時起程並著寶善知

照該將軍速赴吉林助剿以期迅殄逆氛伯彥訥謨祜所帶蒙兵見抵何處著文祥知會該親王相機進剿藉壯聲威見在各股賊匪經官軍分路兜擊勢必紛紛星散所有奉天吉林兩省地方應如何分派各軍嚴密布置之處著文祥豫行籌畫妥爲調度以便諸事就緒屆期卽行回京銷假將此由六百里各諭令知之○諭吳昌壽奏豫軍扼剿張總愚股匪疊獲勝仗喬松年奏皖軍越境剿賊獲勝見仍督令進剿各一摺張逆一股屢經豫軍擊敗回繞於西平舞遂三縣之間亟應乘勢剪滅而賴牛等逆又自湖北回竄光州豫省止此兵力勢難兼顧吳昌壽已派員前赴周口約會李昭慶一軍夾擊卽著曾國藩飭令李昭慶迅速進兵將賴牛等股痛加剿洗其見駐鄂省之馬德昭等軍及喬松年派出追賊之張得勝等軍應如何合兵會剿之處並著曾國藩相機調度毋失

事機至張總愚股匪屢經挫衄吳昌壽當飭宋慶等軍乘勝進剿就地殄除毋令伺隙東竄得與賴牛等逆合股復肆蔓延皖境防剿事宜喬松年督飭英翰等先事豫籌毋稍大意將此由六百里各諭令知之○諭穆圖善奏甯靈回眾待撫見在籌辦情形並遵查燒搶郡城各節一摺甯夏獻城之後陳天佑帶隊進城肆行焚殺殊屬大干軍律陳天佑見經在逃著趕緊查拏嚴行究辦該將軍有督辦軍務之責卽當秉公查訊以期水落石出務須情真罪當以服眾心正無庸另派大員來甯查辦陳天佑所帶東治兩營旣經改派鄭啟貴接統卽著飭令該總兵將所部兵勇妥爲管束以專責成回目馬萬選赫壯圖馬化澂投誠乞恩該回目等曾經糾眾踞城戕官稔惡多年若輕率准其投誠恐狼子野心難消反側著穆圖善懷遵疊次諭旨查明眞僞斟酌辦理納家牘降眾亦

須妥爲安插該將軍當會同地方官悉心經理以期與漢民永遠相安悉泯嫌隙將此由五百里諭令知之○戊申諭內閣前因左宗棠奏參廣東布政使李福泰粉飾戰功當照部議將該藩司降三級調用茲據瑞麟郭嵩燾奏稱該藩司服官粵省二十餘年循聲素著自同治三年委辦軍務尙能悉心調度見當大功告蒞懇恩開復處分等語李福泰粉飾之咎本所應得惟念其平日官聲尙好從戎數載不無微勞可錄著加恩准其開復降調處分來京另候簡用○諭軍機大臣等伯彥訥謨祜奏擊賊獲勝生擒賊首正法及請催昭烏達盟官兵各摺片伯彥訥謨祜行抵八面城後馬賊避兵渡江而西經該親王進擊於鄭家屯地方斃賊八九百名沿途追捕擒斬甚多另股賊首孫九工等盤踞東沙嶺復經該親王馳剿斃匪三百餘名並將賊首趙豁牙等陸續弋獲訊明正

法此次官軍以少擊衆三日之內連獲大勝辦理甚爲得手卽著伯彥訥謨祜督飭各軍將附近一帶餘匪殄除淨盡視賊所向移師進剿隨時與文祥妥籌辦理所有出力員弁准該親王擇尤保奏以示鼓勵據奏昭烏達盟官兵屢催不到復接麒麟慶文稱擬將該盟馬隊畱於熱河防堵請分別議處等語巴林郡王那木濟拉旺楚克於奉調官兵任意遲延者著交理藩院議處麒麟慶於此項官兵擅擬截畱實屬不知緩急著交部議處仍著麒麟慶迅速咨行昭烏達盟長將所調官兵星速派赴伯彥訥謨祜軍營聽候調遣儻再遲誤卽著伯彥訥謨祜從嚴參處將此由五百里各諭令知之○諭瑞麟等奏髮逆全股蕩平見將各營兵勇分別撤畱籌辦地方土匪情形一摺所稱廣東民氣强悍因循日久紀綱廢弛如上年翁源縣利陂塘土匪涂洪古等戕斃知縣張興烈一案匪犯

漏網尙多永安縣候選訓導黃遇周挾仇劫殺劉姓一案日久未辦遂致聚眾抗拒高連陞追賊之師爲土匪相襲一案各鄉寨繳出案匪未及懲辦復任逃脫此外如東莞惠潮肇慶等處已發未發伏莽尤多若不趕緊籌辦必致釀成燎原之禍瑞麟郭嵩燾見擬裁撤方耀等營酌畱二十餘營分三停辦理並移會高連陞勘辦黃陂等處之匪均著照所請辦理廣東兵數勇數不少若果得力何至寇盜充斥至於如此見卽分投辦理恐賊眾兵單在事之勇不能圖功已撤之勇又復爲盜是該省軍務永無了期高連陞所部不過數千人且皆百戰勁旅瑞麟不令帶赴廣東兵將不習何以能濟著懷遵本月十四日諭旨傳知高連陞將所部五千餘人帶赴新任並統率粵境各軍將各處土匪責令該提督次第剿除冀收全效月餉由該督撫籌給不得推諉貽誤廣東籌辦防剿

各員准瑞麟等擇尤保獎毋許冒濫將此由四百里各諭令知之
○諭馬新貽籌辦海塘○己酉曾國藩奏劉銘傳一軍上年十二
月自周家口啟行援鄂正月二十四日行抵河口聞賊之大股盤
踞黃陂縣城內卽由長仙嶺進規該縣二十七日行抵距城二十
五里之王家河候補提督唐殿魁率師在下石港紮營城內出馬
步賊數千直撲該營唐殿魁等率隊分投迎擊賊勢不支紛紛奔
潰張景春率馬勇追至西關外賊館唐殿魁督步隊繼進賊退入
城二十八日五鼓劉銘傳派劉盛藻等率所部分路攻城賊見大
兵逼追出馬步萬餘人分路來撲劉銘傳亦分投迎剿賊卽敗退
入城其馬賊數千仍在城外東南一帶排列我軍乘勝攻城劉銘
傳令畢乃爾李錫增由北門開礮王德成率勇首先登城頭受刀
傷見骨賊猶未退田履安等復相繼蟻附而上賊眾盡由東南兩

門奔出當將黃陂縣城克復劉盛藻等督率各營追殺至城東南二十里之茆屋店賊馬數千折回抵敵仍經我軍擊敗賊盡向新洲一路狂奔而去銘軍擬在黃陂暫駐稍息士力卽行拔隊前往追剿報聞○庚戌諭軍機大臣等戶部奏各省欠解新疆餉銀並歷年積欠甘餉請飭催籌解一摺新疆地處邊陲自回匪滋事以來餉源早經枯竭全賴內地源源接濟方可維持大局乃各省奉撥之餉已解者僅止四十七萬六千兩未解者尙有一百六十三萬四千兩之多實屬任意延玩著崇實駱秉章劉長佑閻敬銘丁寶楨王榕吉吳昌壽迅將前項奉撥未解銀兩趕緊籌措不得再有玩誤除山西應解銀兩仍由綏遠城轉解烏里雅蘇台外其直隸山東河南應解銀兩卽著解交山西由該護撫派員遞解烏里雅蘇台四川應解銀兩卽著解交甘肅由該督派員轉解成祿軍

營交納毋稍延緩至各省自軍興以來拖欠甘餉爲數甚多疊經該督奏催令各該省先籌二三十萬兩及數萬兩解甘乃至今報解仍復寥寥甘省地方瘠苦見在攻剿正當喫緊餉需甚形缺乏各該督撫等理應竭力籌措共濟時艱著曾國藩李鴻章瑞麟郭嵩燾劉長佑閻敬銘丁寶楨吳昌壽劉郁膏喬松年馬新貽劉坤一劉蓉王榕吉各將同治五年協甘新餉迅速籌款委解甘省其歷年積欠甘餉雖一時不能全數起解亦當各先籌一成解往至廣東天津關所欠無多卽著儘數籌解均不得飾詞諉卸致誤要需戶部原摺著摘鈔給閱看將此由五百里諭知曾國藩李鴻章劉長佑崇實駱秉章閻敬銘喬松年馬新貽劉坤一瑞麟郭嵩燾劉蓉吳昌壽並傳諭丁寶楨王榕吉劉郁膏知之○辛亥諭軍機大臣等文祥福興奏官軍馳赴吉林三獲大勝並保守開原縣城

覆陳按捕圍場擬辦情形各摺片覽奏曷勝欣慰此次文祥福興所派兵勇前赴吉林行至長春廳地方適遇馬賊大股陸續渡江而西紛紛回竄有一萬數千名之多定安劉景芳等竟能督率兵勇奮力鏖戰三獲大捷擒斬賊目甚多實足以挫兇鋒而快人心文祥等調度有方定安劉景芳等異常奮勇甚屬可嘉福興帶兵馳赴開原適值股匪來撲城大兵單該署將軍督率兵勇迎擊以少勝眾殲戮甚多布置亦頗合機宜所有在事出力各員著照所請准其擇尤保奏見在長春廳擊敗餘匪多向東南威遠堡邊門一帶逃竄興京地方緊要文祥等務須多撥兵勇分投布置小心保護毋稍疏忽定安所布追賊回向奉天兵力應敷分布著卽妥爲調度飭令將此路逸匪後剿淨盡毋畱餘孽伯彥訥訥祜見帶蒙古兵駐紮八面城前據該親王奏稱屢次擊敗西竄馬賊並授

捕該處土匪疊擒首要各犯頗爲得力卽著文祥等知會該親王在該處嚴密防剿以杜吉林賊股西竄之路所有前調之黑龍江兵一千名仍著歸德英就近調遣並著富明阿遵奉前旨迅速馳赴吉林助剿毋稍延緩賊股見旣四散紛竄並未專據圍場自應先將紛竄之賊盡力掃除再合奉天吉林兩省兵勇入山接捕圍場藏匿餘匪或設法雇募獵戶購綫緝拏務期淨絕根株毋畱餘孽前據丁寶楨奏稱富爾琿所調之參將李其昌已歸直隸開州原籍見咨直隸總督札調惟直東各勇率多油滑俟該參將到東飭令認真挑募等語已批令該護撫詳細察看能否得力據實具奏候旨遵行矣富爾琿能否獨當一面直東勇丁接捕圍場能否有效著富明阿於到吉林後確切查明覆奏該副都統前請設立糧臺之處旣於軍事未便著毋庸議將此由五百里各諭令知之

○欽差大臣文祥等奏遵查扎朗阿在三道林子並無殺賊之事
恩科穆錦德印李天恩所報勝仗俱迹近鋪張業經奏參革職請
免查究報聞○癸丑諭軍機大臣等前因曾國藩奏遵查吳昌壽
於保升遂平縣知縣文玉參劾汝陽縣知縣蘊琛是非顛倒當降
旨將吳昌壽議處文玉卽行革職蘊琛開復原官並令吳昌壽將
揭參蘊琛之本管知府查明參奏茲據吳昌壽奏稱蘊琛懶於辦
公常以看牌拍毘腔爲事先司該管署南陽府知府顧嘉衡開具
清摺送司嗣經藩司訪查屬實請列彈章與之暗合是以據情參
劾並非顧嘉衡通詳揭參可否免其置議等語蘊琛文玉參劾保
舉之案業經曾國藩查明明降諭旨平反自可毋庸置議惟顧嘉
衡於參劾蘊琛何以無印冊印文通詳揭參有無挾私蘇廷魁率
行據以請列彈章有無考察失當之處著李鶴年於到任後秉公

查明據實具奏毋稍徇徇吳昌壽原參摺及此次覆奏摺並劉毓楠曾國藩各原摺均著鈔給閱看將此諭令知之尋奏遵查前撫臣吳昌壽曾面屬蘇廷魁轉飭顧嘉衡將所屬牧令賢否密考是以未用印冊印文惟嗣經飭查又復遁辭諉卸雖無挾私情事實屬前後兩歧藩司蘇廷魁據該府清摺請參並未查出確據亦屬不合請分別交部議處從之○陝甘總督楊岳斌奏遵查雷正綰自願帶領降回進取金積堡等處以贖前愆得旨前據穆圖善奏甯郡各部兵勇已足鎮撫請將雷正綰剿辦甘肅近省回匪免致勾結爲患已寄諭該將軍與該督酌辦卽著該督遵照前旨會商穆圖善相機調遣可也○甲寅諭軍機大臣等官文鄭敦謹奏官軍擊賊出境屢獲勝仗見在分路防剿各情形一摺捻逆自黃陂竄遁後併聚新洲經提督藍斯明等於靠山鋪等處將該逆連次

擊賊斬擒甚眾馬德昭復與韋志俊追至新洲與李濟清水師會
合夾擊大破賊眾乘夜襲攻匪巢追至麻城通遇皖軍進至該處
會合助剿復乘夜襲入賊寨包鈔衝擊連毀賊營數十座追殺六
十餘里斃賊千餘名生擒三百餘名該逆竄向光山楚境已無賊
蹤此股捻匪經鄂皖江豫各軍會剿屢次獲勝足見各省合力會
剿之效惜乎畛域之見猶未盡除僅稱擊賊出境不能就地殄滅
見在該逆殘敗之餘勢甚窮蹙著官文嚴飭將士乘此聲威速將
此股殄盡以期移師西進再將張總愚股匪合力掃除並著曾國
藩卽飭劉銘傳迅率馬隊全軍由武勝關入豫繞出賊前迎頭攔
截其梁美材等馬步各營已隨馬德昭跟追赴豫著官文鄭敦謹
吳昌壽嚴檄該提督等視賊所向盡力窮追張得勝等軍見已回
紮商城卽著曾國藩檄令該軍嚴密扼守以固皖省門戶總期數

省實力會勦不得有名無實官文所請此次暨襄棗勦賊出力各員保獎之處著准其擇尤覈實酌保數員毋許冒濫鮑超一軍如已抵鄂卽著曾國藩飭令馳赴豫省助勦由曾國藩調遣所需餉銀應如何分籌接濟之處卽由官文曾國藩函商奏撥曾國藩此時計可行抵周家口所派劉松山張詩日等軍進至固始與商城相距甚近兵力已厚卽著飭令該提督等與劉銘傳等軍分路進勦以冀迅殄賊氛毋稍延緩將此由六百里各諭令知之○諭楊岳斌劉蓉奏慶陽糧臺請移設西安楊岳斌奏遵催成祿等軍出關各摺片慶陽糧臺僻處偏隅難資轉運楊岳斌等擬撤去慶陽糧臺於涇州秦州慶陽等處設立分局派員轉遞而以西安爲後路總匯並將製造採買轉運等局歸併糧臺提綱挈領所奏係爲因時制宜起見卽著照所請行並責成林壽圖卽在西安辦理甘

肅後路糧臺認真擘畫以期呼應靈通有裨大局所有慶陽裁汰
委員及接統兵勇各事宜著楊岳斌派員妥爲辦理毋稍稽遲成
祿鶴齡兩軍楊岳斌已酌分餉銀催令迅速出關仍著遵旨嚴催
毋許稍涉延玩至該軍出關以後需餉尤關緊要楊岳斌務當設
法源源接濟毋令稍有缺乏致誤師行本日據楊能格片奏發餉
均照舊章辦理並無膜視前敵之事譚玉龍挾奏參周顯承之嫌
屢次蒙稟見已咨稟督撫各等語著楊岳斌趙長齡秉公詳查據
實具奏楊能格請飭陝省力籌糧餉接濟涇慶之處著楊岳斌劉
蓉督飭林壽圖竭力籌辦陸續解濟以拯飢軍楊能格片一件著
鈔給楊岳斌趙長齡劉蓉閱看將此由六百里各諭令知之○諭
楊岳斌劉蓉奏慶陽糧臺請移設西安一摺慶陽糧臺僅顧隴東
一路而防兵委員糜費頗多經該督撫等通盤籌畫擬撤去慶陽

糧臺於涇州秦州慶陽等處設立分局而以西安爲後路總匯請飭協撥慶陽月餉各省移解陝西藩庫等語自係爲關隴全局起見所奏尙屬可行嗣後協餉各省自應將餉銀移解陝西總局以免紛歧著崇實駱秉章閻敬銘吳昌壽丁寶楨王榕吉按月將慶陽糧臺協餉委員徑解陝西藩庫西安距各省道里較近且免繞越之虞各該督撫等務當隨時解濟毋稍缺乏將此由六百里諭知崇實駱秉章閻敬銘吳昌壽並傳諭丁寶楨王榕吉知之○以李鴻藻爲禮部右侍郎由內閣學士遷○乙卯諭軍機大臣等本日都興阿到京陛見不日即可赴任前因該將軍辦理軍務有年尙稱老練是以調任盛京將軍乃上年冬閒甯夏回眾投誠郡城收復之後該將軍無端帶隊進城任令兵勇肆行搶殺以致回漢居民盡遭荼毒辦理實屬乖繆疊經交部議處部議請將該將軍革職治

罪因一時簡調乏人降旨將都興阿加恩改爲革職畱任惟盛京
地方積弊甚深將軍兼轄文武責任綦重該將軍到任後於一切
事宜辦理能否妥協不至貽誤著文祥畱心察看據實具陳見在
吉林賊匪經官軍疊次剿除聲威大振諒不難剋日蕩平惟圍場
山內餘孽潛藏恐尙不少所有吉林奉天兩省應如何分兵布置
接剿之處著妥爲籌畫調度務臻周密其先後所調京兵天津洋
槍隊直隸馬步兵勇應如何分別撤畱福興是否可以暫畱奉天
帶兵剿賊抑或與該尙書一同回京均著文祥酌度情形奏明辦
理將此由四百里密諭知之○諭寶善奏派兵過界剿賊克復雙
城堡一招雙城堡失守後經寶善派令托什納德勝等前往援剿
連夜環攻賊眾冒死衝出官兵乘勝追剿直至拉林河賊匪狂奔
四散見將三姓營總農英阿暫駐雙城堡控緝餘匪飭德勝赴伯

都訥界助守托什納赴阿勒楚喀會同該城協領接拏土匪卽著
賁成該營總等分赴各城界實力防守毋稍疏懈見在伯都訥阿
勒楚喀等處是否尙有大股賊匪著卽查明具奏雙城堡出力各
員著寶善擇尤酌保毋許冒濫北路三城收集潰兵安撫難民一
切善後事宜在在均關緊要見在均無大員駐守無所責成著富
明阿德英揀派得力之員前往各該城分投辦理以靖地方並將
該處官員下落詳細查明據實具奏將此由五百里各諭令知之
○廣湖北黃安縣學額八名湖南龍陽四名○丙辰諭軍機大臣
等馬新貽奏巡視海口情形酌議改造戰船粵省軍事已定藩司
蔣益澧應否前往各一摺官軍搜捕洋盜全賴船械得力方能奏
效馬新貽見擬改造紅單廣艇三十號合之張其光原帶廣艇十
隻共計四十號分派溫州等處各要口並購買外國輪船一兩隻

以爲遊擊雕勦之用所籌尙屬周妥均著照所請行仍著馬新貽督飭沿海各將弁就見有師船認真巡緝按捕餘匪以靖地方毋得稍涉疏懈本日已明降諭旨授蔣益澧爲廣東巡撫卽著蔣益澧趕緊交卸起程前赴新任蔣益澧經朝廷擢膺疆寄責任非輕到任後務將軍務吏治及籌餉各事宜力加整頓以期日有起色毋得稍蹈因循積習致負委任將此由五百里各諭令知之○命郭嵩燾來京以蔣益澧爲廣東巡撫楊昌濬爲浙江布政使王凱泰爲浙江按察使

由補用道遷

○丁巳諭軍機大臣等丁寶楨奏豫捻

折竄東境見在飭軍布防移紮東平一摺捻匪張總愚由豫境率黨東竄已至曹考交界之許河寨長樂寨並定陶縣屬境林窪喬樓一帶該匪晝夜狂奔勢必銳意東趨圖擾腹地曾國藩見在齊甯著卽督飭潘鼎新等軍迎頭截擊力遏賊蹤並著閻敬銘丁寶

檳嚴飭開河十營布置運岸毋令該匪乘隙偷渡賊捻大股在後未動吳昌壽務當不分畛域派兵追躡期與東省各軍會合夾擊以收聚殲之效直隸與東境毗連州縣延袤數百里亦應嚴密設防卽著督飭水師礮船認真防範並飛檄陸路將弁一體相機截剿毋得稍有疏虞丁寶楨另摺奏察看參將李其昌招勇未能得力擬改派副將張得魁帶勇千名馳赴奉省助剿等語奉天吉林馬賊疊經官軍剿洗屢獲大捷見在賊勢窮蹙指日可期蕝事前調京營兵勇已酌量撤回而東省剿辦正須厚集兵力所有張得魁一軍卽著畱於東省交丁寶楨調遣以資得力毋庸前赴奉省將此由六百里諭知曾國藩劉長佑閻敬銘吳昌壽並傳諭丁寶楨知之○戊午諭軍機大臣等鮑超奏拔營抵江擬請籌撥餉項採辦戰馬整隊赴豫一摺前因鮑超一軍調豫助剿曾經諭令官

文曾國藩將該營所需餉項函商奏撥茲據鮑超奏稱豫省地勢平曠利在騎戰見在派員採買戰馬並赴粵購辦馬槍等件俟馬匹到齊編立十五營操演候調至所部新舊各軍月需餉銀九萬七千零馬隊編立照章需餉三萬四千零合共月需餉銀十三萬一千有奇此時東南軍務告竣江省各軍分別裁撤該營月需餉銀可否仍由江西籌撥馬隊均用洋槍所需洋藥洋火請飭廣東陸續採運各等語著官文曾國藩懷遵前旨將鮑超軍營月餉迅速函商籌撥有著之款源源接濟如鄂省餉需缺乏不能全顧鮑超軍餉或由江西每月協濟若干亦著官文曾國藩酌度情形奏明辦理其洋槍所需火藥等件應用若干並著官文等酌定數目咨明廣東趕緊籌辦以利師行捻匪張總愚見由豫境率黨東竄已至曹考界內而賴牛等逆尙蔓延於光州等處亟應分兵剿辦

著鮑超迅率所部剋日起程由鄂赴豫探明賊蹤認真剿辦毋稍
遲延鮑超摺著鈔給官文曾國藩閱看將此由六百里諭知官文
曾國藩並傳諭鮑超知之○已未諭內閣前因左宗棠奏參福建
布政使張銓慶昏愎糊塗意存戀棧曾經降旨將該員卽行革職
茲據徐宗幹奏張銓慶在閩浙軍營二十餘年辦理文案尙爲通
達在藩司任內勤儉著稱雖器識稍近褊狹而誠實廉謹尙可降
格量用等語張銓慶著吏部調取引見○諭軍機大臣等李瀚章
奏黔苗經官軍擊退見剿銅仁教匪情形及朱南桂劉連捷兩軍
未能赴甘並遵催曾國荃赴任各摺片黔省寨頭苗匪屢擾楚疆
經周洪印等督軍擊敗賊遁回巢惟銅仁教匪見由黃瓜巖出撲
謝家橋並有盤踞壩關溪之意設再與苗逆句通一氣勢將益肆
蔓延李瀚章見飭周洪印等軍赴銅剿辦教匪以翦苗逆羽翼所

辦甚合機宜卽著嚴檄周洪印等迅速圖功將教匪痛加剿洗以期併力寨頭捻渠埽穴張亮基督飭銅仁文武員弁會兵剿辦務殄賊氛毋得稍涉遲誤朱南桂劉連捷患病未愈所部亦均遣散自難剋日赴甘惟甘省軍務緊要差委需人仍著李瀚章隨時察看如該二員病已就痊卽行奏明飭令赴甘以資得力曾國荃見已料理行裝定期就道著李瀚章傳知該撫迅速馳赴新任力圖報稱不得稍有遲延將此由五百里各諭令知之○追予福建殉難道員徐曉峰諡剛毅並交國史館立傳○予福建殉難署總兵官祿魁知府扎克丹布建祠並縣丞王秉剛等祭葬世職○予廣東殉難同知羅才綸建祠